

9 16 119  
L'heureux Esclave.

NOUVELLE.

---



---

Imprimé à COLOGNE,  
Et se vend à Londres, chez M<sup>rs</sup>. Ja-  
ques Magnes & Richard Bentley  
à la Poste de Russell-street au  
Covent-Jardin. 1677.



*Collegium Iesu Cantabrigiense*  
1700





A Monseigneur

Le Comte d'OSSORY,  
Baron de MOOR-PARK,  
Conseillier du Roy en son  
Conseil-Privé, Chevalier de  
l'Ordre de la Jarretiere,&c.

Monseigneur,

**I**L ne manquoit plus à  
la fortune de cét heu-  
reux Esclave, que de tom-  
ber entre les mains d'un  
aussi genereux Patron que

A 2      vous.

*vous. Pour moy, qui m'estois chargé du soin, de luy en trouver un, j'ay bien voulu, le luy donner tel, qu'il eust à se louer tout à fait de mon choix. Et en verité à qui pouvois-je m'adresser plus justement, pour faire ce present, qu'à un Seigneur, qui par ses rares Qualitez aussi bien que par sa Naissance, s'acquiert tous les jours des Esclaves & des Creatures. Il n'est pas necessaire, pour estre instruit, de ce que je dis, de Vous estudier*

dier dans le particulier, ni  
d'escouter les tesmoinages  
publics qu'on en rend dans  
tout ce Royaume : Le bruit  
de vostre Gloire va plus  
loin que de l'Angleterre ;  
il n'est Cour dans l'Eu-  
rope, où il n'ait penetré,  
pour vous attirer le cœur  
& l'admiration des bon-  
nestes gens. Mais, Mon-  
seigneur, pour sçavoir plus  
parfaitement, quel est vo-  
stre Merite, il n'y a, qu'à  
considerer l'estime particu-  
liere, qu'a toujours eu pour  
vous le plus grand & le

plus éclairé de tous les  
Monarques : Le choix qu'il  
a fait de vostre Personne  
pour les principaux Em-  
ploys de Guerre & pour  
les plus importantes nego-  
tiations de Paix ; & le  
fonds qu'il fait tous les  
jours sur vostre penetration  
& sur vostre capacité  
dans son Conseil. Ce seroit  
icy, Monseigneur, le bel  
endroit, pour m'estendre  
sur vos loüanges, si mon  
encens estoit d'un prix pro-  
portionné à un si grand  
sujet ; mais l'entreprise est  
trop

les  
il  
ne  
n-  
ur  
o-  
le  
s  
n  
é  
t  
l  
e  
a  
.  
trop vaste & trop difficile  
pour un Auteur comme  
moy ; & vostre Gloire  
est si bien en sureté dans  
l'estime universelle , qu'a  
pour vous toute la Terre,  
qu'elle n'a pas besoin de  
nouveaux Eloges. Il vaut  
mieux , que je songe à  
vostre plaisir. L'heureux  
Esclave à impatience de  
vous entretenir de ses a-  
vantures. Ce sera dans  
vos heures de loysir & de  
delaissement ; & si son bon-  
heur va jusqu'à ne vous  
pas déplaire , je le tiens  
plus

plus heureux , qu'avec  
toutes les bonnes fortunes  
qu'il a eu en sa vie. Je ne  
crois pas, au moins, qu'il  
puisse rien souhaiter avec  
plus de passion ; si ce n'est,  
que celuy, qui à pris la li-  
berté de vous le presenter,  
se puisse dire avec beau-  
coup de Respect,

Monseigneur,

Vostre tres-humble &

tres-obeissant Serviteur,

S. Bremond.



## A V I S.

**V**Oicy un livre qui ne mérite pas un avis ; & celui, que j'y fais, n'est pas pour prendre les devans de la Critique. Je ne crois pas, qu'il y ait de bel Esprit, qui voulust exercer la sienne sur une Bagatelle, ou j'ay mis peut estre moins de tems, qu'il n'en faudroit pour la Critiquer. Mais c'est, qu'il a plû à certaines Personnes, peu indulgentes pour un Auteur, de faire des histoires

histoires sur mes histoires mêmes, & d'estendre mon imagination, jusqu'à des conjectures, dont je n'ay jamais esté capable. Il seroit assez aisé de m'en justifier, si l'on le souhaittoit; mais je crois que mon procedé la assez fait: & dedier un livre a un des premiers Seigneurs d'Angleterre, & y mettre mon nom, n'estoit pas pour me faire des ennemis, & pour me perdre. J'ay bien fait des fautes en ma vie, mais jamais de cette nature. Je declare donc au Public, & sur tout à ceux, qui se messent de penetrer dans les intentions d'autrui, que sous le sens litteral de mes historiettes, il n'y a point de sens allegorique



rique caché; que parlant du Turc & de l'Afrique, je n'ay point mes idées en Europe, ni sur aucune autre Nation; & qu'on me fera penser tout autre chose, que je ne pense, si l'on me fait dire tout autre chose, que je ne dis. Si les intrigues, ou les aventures, que j'écris, ont de la conformité avec quelques unes de nostre tems, je n'en suis pas responsable: C'est la faute du hazard, & non pas la mienne. Il se passe aujourd'huy tant de galanteries dans le monde: il y a tant de gens qui aiment que quoyque l'amour ait une infinité de routes il est difficile qu'on ne se rencontre pas quelque fois. S'il ne falloit  
écrire

écrire que des choses rares & extraordinaires on seroit bien tôt épuisé. Je supplie seulement le lecteur de me rendre quelque justice la dessus & de ne payer pas d'ingratitude les presens que je luy fais *de mes Bagatelles*. Celle-cy sera suivie d'une seconde partie, ou l'histoire de *Laura* qui en fera le Principal, sera quelque chose d'assez galant & vaudra bien celle de la *Sultane*.

L'heu-



L'heureux Esclave.

NOUVELLE.

**L'**Afrique passoit depuis quelques siècles pour une Partie du Monde, ou les gens estoient aussi cruels & aussi farouches, que les Lyons & les Tygres dont Elle est remplie : Mais depuis les descouvertes amoureuses qu'on y a fait, il a bien paru, que l'Amour est de tout Pays ; & que la Barbarie même n'a de barbare, que le nom voicy une Galanterie qui en sort, & qui pourra justifier, ce que je dis, & les nouvelles qu'on en a rapportées.

B

le

Le Comte Alexandre jeune Seigneur Romain fort considerable par les biens de la fortune, mais encore plus par sa naissance & les qualitez de son esprit, estoit à peine entré dans le monde, qu'il se vit pressé par ses Parens de se marier. C'estoit un jeune Cavalier bien-fait, qui avoit de l'esprit, comme ceux de l'ancienne Rome & l'ame aux plaisirs, comme ceux de la nouvelle; fort volontaire de son humeur, ne suivant en toutes choses que son panchant & son caprice : Pour le mariage de l'avis des honnestes gens, qu'il ne falloit s'y embarquer que le plus tard qu'on pouvoit. Le pauvre meuble, disoit il, qu'une femme ? j'en prens a tésimoin la plus part de ces messieurs les mariez ; & surtout dans ce tems, qu'il semble, qu'on ne se marie, que pour les autres. Il tiroit ces consequences,  
 autant

autant sur son experience propre, que sur l'exemple d'autrui : Car estant jeune, bienfait & riche, qualitez plus que suffisantes, pour ne manquer pas de bonne fortune, auprez d'un sexe aujourd'huy fort susceptible, il avoit trouvé assez dequoy se divertir; & il n'avoit pas envie, qu'on luy rendist, ce qu'il avoit presté aux autres.

Cependant les interests de famille, qui empoisonnent souvent, ce qu'il y a de plus doux dans la vie, obligeant les plus honnestes gens à faire comme les autres, le jeune Romain aimâ mieux, pour se delivrer de l'importunité de ses parens, quitter les plaisirs de Rome, & aller faire un voyage, que de s'assujettir à une loy si contraire a ses sentimens & a sa liberté qu'il aimoit preferablement à toutes choses. Il fit con-

fidance de son dessein à un Valet de Chambre, qui le servoit depuis long tems, & qui estant un garçon d'esprit, eut bien tôt mis ordre à tout ce qu'il leur falloit.

La belle Saison estoit venuë; le temps estoit fort propre pour les voyages, & un beau jour, sans prendre congé de personne, il part de Rome avec ce seul Valet, & se vient embarquer a Civitta Vechia, sur une Felouque qu'il prit exprez pour luy. Son dessein estoit de voir, ce qu'il y avoit de plus belles cours dans l'Europe, & de commencer par celle d'Espagne; mais il y a des gens, sur qui la Fortune prend un tel empire, qu'il semble qu'elle soit jalouse, de tout ce qu'ils projettent, sans la consulter. Elle preparoit au Comte Alexandre, qui n'avoit envie de voir que l'Europe, une promenade en Afrique;

&

& Tunis estoit marqué parmy les villes qu'il devoit voir dans son voyage. Le detour estoit un peu grand ; mais quand la Fortune s'en mesle, il faut , qu'il y ait toujours quelque chose d'extraordinaire, parce qu'on ne la reconnoit qu'à ses excez.

Ce fut dès le quatriéme jour du depart de Civitta-Vechia, que ce jeune Seigneur commença de voir , que sur la mer, ou tous les Elemens sont à craindre, les hommes, ennemys les uns des autres, sont plus à craindre, que les Elemens. Il avoit eu jusques là le plus beau tems du monde ; pas un soufle de vent contraire : ses Battelliers avoient ramé, tant qu'il avoit voulu, & il se felicitoit déjà luy même sur le bonheur de son voyage.

La coïste d'Italie est un peu dangereuse, & sur tout en esté, il

n'y fait pas peur. Elle est sujette à l'abbord de certains Peuples du midy, qui n'ont point d'autre commerce, que celui de voler, & dans les beaux jours, le Trafic de ces sortes de Marchands est si grand, que, qui n'est pas sur la deffensive, est bienheureux s'il eschappe de leurs mains. On voit bien, que c'est des Corsaires de Barbarie, que je veux parler. Le Comte Alexandre, qui ne croyoit pas d'estre sorty de Rome, pour estre mené en Triomphe à Tunis, se vit, à la pointe du jour, salvé par un Brigantin de cette nation là. Les pauvres Battelliers prirent d'abord l'allarme : il ne faut que la veuë d'un seul Turban pour les épouvanter ; & à peine les Turcs eurent fait sur eux une descharge de trois ou quatre coups de mousquet, qu'ils se jetterent dans la mer, pour se sauver  
à



à la nage à terre. Le Comte Italien demeura avec son Valet dans la Felouque : non pas qu'il espé-  
rât, de se pouvoir deffendre, con-  
tre un tel nombre d'ennemys, il  
auroit fallu, pour cela, le Bras de  
Roland, ou les armes enchantées  
des anciens Amadis. Aujourd-  
huy tout homme est homme, & le  
secrèt d'enchanter les armes s'est  
perdu comme tant d'autres : mais  
ne sçachant pas nager, pour faire  
comme les Battelliers, & ne  
haissant pas encore la vie, il crut,  
qu'il valoit encore mieux, estre  
fait Esclave, que de se noyer.  
Neanmoins pour faire voir à ces  
Barbares, quel homme il estoit, &  
leur vendre sa liberté, le plus  
cher qu'il pourroit ; aprez avoir  
fait jetter à son Vale: toutes ses  
hardes dans la mer, il luy donna  
les ordres, de ce qu'il vouloit,  
qu'il fist. Je ne veux pas m'ar-  
rester

rester à deſcrire cette action,  
 quoyqu'elle ait paſſé pour une  
 des plus glorieuſes qu'il y ait ja-  
 mais eu ſur la mer mediterrannée,  
 de deux hommes contre plus de  
 trente, dont il y en eut ſix de  
 mis ſur le carreau, & je ne ſçay  
 combien de bleſſez. Ce fut un  
 combat d'une troupe de Loups  
 contre deux jeunes Lyons, qui  
 ſe deffendirent avec une valeur &  
 une intrepidité qui n'eurent ja-  
 mais rien d'égal. Il eſt vray, que  
 les Turcs qui les meſnageoient  
 un peu, pour ne perdre pas l'ar-  
 gent de leur rançon, ne ſe ſer-  
 virent, du commencement, que  
 de quelques baſtons, mais à la  
 fin la mort & le ſang de leurs  
 Camarades, & la honte d'une ſi  
 longue & ſi opiniâtre deſſenſe  
 de deux temeraires Chreſtiens,  
 contre tant de gens qu'ils eſtoï-  
 ent, leur ayant mis la rage dans  
 l'ame,

l'ame, ils eurent recours au fabre: Sibien que le Valet ayant esté tué, & les forces manquant au jeune Comte, plustôt que le courage, aprez les blessures qu'il avoit reçues & le tems, qu'il combattoit, il fallut succomber, ne pouvant plus lever le bras, pour se servir de son espée. Ces ames lâches n'osoient encore presque l'abborder; & ne s'approcherent de luy, que quand ils le virent tomber à la renverse. Ils le prirent, & le mirent sur le Brigantin, où ils tâcherent de luy donner tout le secours, qu'ils pouvoient, pour luy sauver la vie, n'ayant pas d'autre marque de victoire, que la prise d'un si vaillant homme, qui leur coustoit trop, pour s'en devoir faire honneur. Ils le regardoient tous avec admiration, & ne pouvoient comprendre, comment dans une jeunesse

nessé si tendre, il y pouvoit avoir tant de valeur, & dans un corps, qui paroïssoit si delicat, tant de force, pour faire les actions, qu'ils luy avoient vû faire. Comm'ils sont naturellement fort superstitieux, ils crurent effectivement, qu'il y avoit quelque chose de plus que du Naturel dans la Personne de ce jeune homme, ou du moins, que c'estoit la fleur de tous les Chrestiens. Cette Pensée leur servit à supporter plus patiemment leur honteuse victoire; & comm'ils se trouvoient un peu foibles de gens, & qu'ils avoient déjà fait d'autres Prises plus considerables, ils prirent la resolution de s'en retourner à Tunis.

Le tems leur fut favorable, & apres quelques jours de navigation, ils arriverent a la Goulette; ou s'estant desbarquez, ils mirent le pauvre Comte sur un Cheval,

val, lié, garrotté, comm'un voleur, & le conduisirent à la ville. Quelques uns de ces Barbares, qui avoient déjà pris les devans, firent un tel bruit de sa valeur & de son courage, qu'ils attirèrent non seulement les gens ordinaires, à qui peu de chose donne de la curiosité ; mais les principaux de Tunis, & jusques au Bassa, qui accompagné de plusieurs de ses amys, se vint promener vers les ruines de Cartage, pour voir arriver ce fameux Chretien. Ils se figuroient tous, que ce devoit estre un homme, dont l'aspect seul devoit faire peur ; mais quelle fut leur surprise ! quand ils virent venir un jeune homme, qui, quoyque passe & defait, ne laissoit pas de marquer quelque chose de grand dans sa bonne mine. Il n'y eut personne, qui n'en eust pitié : & le  
Bassa,

Bassa, qui estoit l'homme du monde le plus honnestes & le plus genereux, conceut d'abord une telle indignation contre ces Infames, qui menoient de cette cruelle maniere un homme, qui le meritoit si peu, qu'il leur com-menda de le dessier sur le Champ, ou bien qu'ils éprouveroient les derniers effets de sa colere: Il fut obeï: Il n'y avoit pas à re-sister a un Seigneur, comme luy, qui aprez le Dey avoit le plus de pouvoir & le plus d'autorité dans le Royaume. Il leur de-menda, ce qu'ils vouloient de leur Esclave; & l'ayant fait conduire dans son propre Palais, il leur fit compter cinq cents Piastrs ou Patacons, qui estoit l'argent, qu'ils en avoient demendé.

Le Comte Alexandre, trop heureux d'estre tombé entre les mains d'un si bon & si genereux Patron,

Patron, commença un peu à respirer. On le mit dans un fort bel appartement, où les Chirurgiens du Batta vinrent visiter ses blessures, qui estant un peu mieux pensées, que sur ce Brigantin, il s'en trouva fort soulagé. Il estoit foible & extrêmement abbattu, de ce qu'il avoit souffert sur la mer avec ces Barbares, qui, n'ayant pitié de personne, n'avoient pas eu trop de soin de luy: mais pour sa vie, il n'y avoit point de danger. La fièvre, qu'il avoit, n'estoit pas grande; & on esperoit, qu'en peu de jours il seroit remis en bon estat. Le Batta luy rendoit visite soir & matin; & ses soins & son empressement redoubloient à mesure, qu'il le voyoit d'avantage, & qu'il le connoissoit plus particulièrement prenant de jour en jour plus d'estime, & plus d'amitié pour luy.

C

Mais

Mais avant que de passer outre, je crois qu'il ne sera pas hors de propos, pour la curiosité du Lecteur, de dire un mot sur la Personne, la naissance & le caractère de ce Seigneur. Mahomet Bassa-Bey, Pere de Sily Morat & de Mahomet Lapsy les Beys d'aujourd'huy, estoit fils d'un Renegat de l'Isle de Corse de la maison de Pietro-Sancti, qui par les belles qualitez de sa Personne, autantque par celles de son esprit, estant devenu favory du Dey, cù Roy du Pays, se mesnagea si bien dans les bonnes graces de ce Prince, qu'il fut eslevé aux premieres charges du Royaume, dont il laissa heritier son fils Mahomet. Et sans m'estendre d'avantage sur l'histoire, je diray seulement, que le jeune Mahomet s'estant furieusement brouillé avec le Dey & le Divan,

qui



qui autrefois jaloux de l'autorité de son Pere, auroient voulu diviser ces deux charges de Baïa & de Bey, fut à la Porte du Grand Seigneur, d'ou il revint triomphant. Jamais Tunis n'a fleury, comme de son tems. C'estoit un homme propre à tout, pour les armes, comme pour la galanterie : Qui avoit infiniment de l'esprit, à tout ce qu'il faisoit, brave, honneste, magnifique plus qu'on ne pouvoit l'estre. Il aimoit les Chrestiens, & leur faisoit rendre justice. Il entretenoit un commerce de civilisé avec beaucoup de Princes de l'Europe. Il envoyoit, & recevoit tous les ans des presens du Grand Duc de Toscane. Enfin jamais Seigneur de ce Pays la, qui l'ait porré plus beau, & qui ait eu plus de merite & plus de reputation que luy. On peut dire, qu'on voit encore

quelque image de cette splendeur en la Personne de Mahemet Lapsy son fils; mais non pas de cette maniere. C'estoit un homme qui avoit les veritables inclinations d'un Grand Seigneur, comm'il l'estoit, & l'ame d'un parfaitement honneste homme.

Il fut d'abord charmé de l'esprit admirable du Comte: il goſtoit avec un plaisir extreme sa conversation; & passoit quelque fois les trois ou quatre heures, assis sur son liſt, à s'entretenir familièrement avec luy. Ce qui l'estonnoit, c'estoit, que de quelque chose, qu'il luy parlât, il le trouvoit si ſçavant & si esclairé, qu'il ne pouvoit assez l'admirer. Il parloit de luy à tous ses Amys avec des Eloges & une affection si tendre, qu'il luy gaignoit l'estime & l'amitié de tout ce qu'il y avoit de Principaux Seigneurs  
dans

dans le Royaume, qui le venoient voir, & qui luy fesoient des presens selon la coustume du Pays.

Le Bassa jugeoit bien à tant d'illustres marques, que ce jeune Chrestien fesoit voir, qu'il ne devoit pas estre d'une condition ordinaire : Il n'avoit neanmoins jamais voulu l'interroger sur cela. Il sçavoit seulement, qu'il estoit Italien, & c'estoit tout. Le Comte, non plus que luy, n'avoit jamais osé le luy dire, craignant, que la connoissance de ce qu'il estoit, ne rendist sa liberté plus difficile; mais aprez les graces & les bontez, qu'il recevoit tous les jours de ce Seigneur, il crut, que sans estre ingrat, il ne pouvoit plus se celer a un homme, a qui il estoit plus que redeuable de la vie. Pour cet effet, un jour, qu'il luy eut demendé, s'il n'avoit

pas des Parens dans son pays, & pour quoy il ne leur écrivoit point; Seigneur, luy dit il, je serois le plus lâche de tous les hommes, si je perdois jamais le souvenir des obligations, que je vous ay ; & il n'y auroit pas un plus mal-honneste homme que moy au monde, si quelque crainte, où quelque consideration m'empechoient de vous rendre, ce que je vous dois. Je vous avoueray, & j'espere, que vous me le pardonnerez, que j'ay fait difficulté, de me faire connoître tout a fait à vous, de peur, que ma captivité n'en fust plus dure, & qu'on n'en mist ma liberté à plus haut Prix. Mais apres ce que je vois tous les jours; apres, Seigneur, tant de generosité & tant de bonté dont vous me comblez, je ne puis me deffendre, pour que vous ne perdiez pas les droits, que vous

vous avez sur un Esclave, comme moy, de vous declarer, que je suis de Qualité, & d'une des plus illustres familles de Rome : Que mon nom est le Comte Alexandre, & que si vous me rendez jamais la liberté, je vous dois payer ma Rançon avec toute la reconnaissance des bienfaits, que j'ay receu de vous. Le Bassa se prit à rire, & l'embrassant avec beaucoup de tendresse, Alexandre, luy dit il, la connoissance que vous me donnez, de ce que vous estes, ne rendra pas vôtre condition pire, qu'elle n'est. Je ne suis point marchand d'Esclave; je ne vous ay pas acheté, pour vous revendre. Vous estes libre : vous vivrez avec moy & dans ce pays, comme si vous estiez dans le vôtre avec un de vos amys; & si je vous y retiens un peu plus long tems, que peut être vous ne souhait-

haïtteriez, ce fera parce que j'auray bien de la peine, de me séparer d'un homme, pour qui j'ay beaucoup d'estime & beaucoup d'affection. Aprez ces paroles il luy en dit encore d'autres toutes pleines d'amitié, & qui causerent une si sensible joye dans l'ame du jeune Comte, qu'elles le consolèrent de tout le chagrin que la perte de sa liberté luy avoit pû donner.

D'abord qu'il se porta bien & qu'il eut repris les premières forces, il fut de tous les plaisirs du Bassa soit de chasse, soit de promenade, soit de course a Cheval ou il se fesoit toujours considerer par dessus tous les autres. Jamais Chrestien n'a tant fait parler de luy dans ce Pays la. Il n'y avoit pas de Personne considerable, qui ne le vist très-volontiers, & qui ne se fist un  
extreme

extreme plaisir de le recevoir chez luy & de le Regaler ; faveur assez particuliere aux gens même de la Nation, à plus forte raison pour un homme d'une Religion, dont ils sont les ennemys declarez. Cela marque la force du merite, & que rien ne résiste aux influences d'un heureux destin. L'estime, que le Basia fesoit publiquement de luy, contribuoit beaucoup a tous ces avantages ; mais sa propre Personne, & la maniere douce & honneste d'agir, qu'il avoit avec tout le monde, estoit ce qui fesoit le plus d'effet, & qui luy attiroit l'amitié des plus honnestes gens.

Toutes ces illustres connoissances neanmoins & tous ces agreables divertissemens, tant d'honneur & tant de graces, qu'il recevoit des uns & des autres, ne l'empechoient pas de soupírer  
quel-

quelquefois pour son retour en Europe. Il vivoit en homme libre ; mais il estoit Esclave de l'arrestation du Bassa, dont, il jugeoit bien, qu'il seroit plus difficile de se delivrer, que de la chaisne. Son esprit ne trouvoit pas, parmy cette Nation, les gens qu'il luy falloit ; & il languissoit, s'ennuyoit avec eux. Les Turcs ont du bon sens : ils raisonnent assez bien sur les choses du monde : ils sont même fins & grands politiques ; mais pour du bel esprit & de la Politesse, ils ne sçavent, ce que c'est. Leur conversation est fort sterile ; Elle se passe plus en fumée de Tabac, qu'en beaux raisonnemens. Ils n'ont qu'une mediocre connoissance, de ce qu'ils parlent ; parce qu'ils n'ont ordinairement point de lecture, & qu'ils ne sortent presque jamais  
de



c'e leur Pays. Le Bassa avoit tout  
 seul plus d'esprit & plus de rai-  
 son, que tout les autres en-  
 semble; mais il ne pouvoit pas  
 estre toujours avec luy, les  
 employs, qu'il avoit dans le  
 Royaume, l'occupant à mille  
 affaires differentes, dont il ne  
 pouvoit se dispenser. Pendant  
 ce tems-là, le Comte alloit passer  
 les heures d'ennuy dans le jardin  
 du ferrail, où il luy avoit permis  
 de s'aller promener. C'estoit un  
 lieu retiré & fort agreable il y  
 venoit rever quelques heures du  
 jour : & c'estoit la, où l'on peut  
 dire, qu'il passoit le tems le plus  
 doux de sa vie. Mais que ces  
 jours la estoient differens de  
 ceux de Rome ! Cette solitude  
 le rendoit un peu melancholique,  
 à quoy les Italiens ont assez de  
 panchant. Son Patron, qui l'ai-  
 moit d'une veritable affection, &  
 qui

qui auroit souhaitté de le voir  
 toujours de belle humeur, souff-  
 froit, de ce qu'il estoit ainsi triste  
 & reveur; & luy en ayant plu-  
 sieurs fois demendé la raison, il  
 n'en avoit jamais pû tirer d'au-  
 tre, si ce n'est, que c'estoit un  
 effet de son Temperement.  
 Comme il ne luy laissoit rien de-  
 sirer, de tout ce qu'on pouvoit  
 pretendre d'un Pays comme ce-  
 luy-là pour les plaisirs de la vie,  
 qu'il n'eust a profusion, il ne  
 sçavoit, ce qui pouvoit estre la  
 cause de ses chagrins; & cher-  
 chant tous les jours à le deviner,  
 il luy vint a la fin dans l'esprit,  
 qu'il manquoit aux divertissemens  
 d'Alexandre un peu de conver-  
 sation avec quelque femme.  
 Comme c'estoit un Seigneur fort  
 galant, il n'eut pas beaucoup de  
 peine, a se persuader, que c'estoit  
 là le veritable sujet de sa melan-  
 cholie.

cholie. Le mal n'estoit pas sans remede; il prit d'abord la resolution de l'en guerir, & de luy trouver une maistresse. C'estoit pousser la complaisance un peu loin, pour une Personne de son caractere; mais l'amitié, qu'il avoit pour son cher Alexandre, n'avoit point de bornes.

La Loy de Mahomet est fort severe sur ce Chapitre à l'égard des Gens de toute autre Religion, quoyqu'à ses Disciples Elle soit fort indulgente. Il faut, quand on y est trouvé avec une Turque, où changer de Religion ou estre bruslé. Ces deux extremittez sont assez dures; mais quoyque plusieurs Chrestiens s'y soient laissé prendre, pas un, que je sçache, n'a encore pris le party du Ieu: ils ont mieux aimé estre Circoncis que d'estre brusléz, le martyre n'en est pas si cuisant. Le

D

Bassa,

Bassa, quoyque fort peu religieux observateur de sa Loy, vouloit neanmoins evitter le scandale, en cas que l'intrigue vint à estre decouverte ; & fit dessein de la lier avec une Chrestienne.

Il y avoit, auprez de la Sultane sa femme, une Esclave Italienne, qui estoit une fille de qualité, fort aimable & de beaucoup d'esprit. Il en avoit esté amoureux luy même, il n'y avoit pas long tems ; mais sans aucun succez, soit que cela vint de la consideration, qu'elle avoit pour la Sultane sa maistresse, qui l'aimoit beaucoup, où de certains scrupules de Religion sur laquelle Elle s'excusoit fort envers luy : Quoyqu'il en fust, c'est la verité, qu'il n'y peut jamais rien avancer ; & qu'aprez trois mois de soin, de poursuite, & d'empressement, n'estant pas accoustumé a  
tant

tant de resistance, il s'en rebutta,  
 & jetta les yeux sur d'autres con-  
 quêtes moins difficiles. Il espe-  
 roit, que de Chrestien à Chrestien  
 cela reussiroit mieux; & qu'A-  
 lexandre, qui estoit un jeune  
 homme propre à donner de l'a-  
 mour, n'auroit, qu'à se faire voir,  
 pour estre aimé d'une fille, qui  
 estoit de même Pays & de même  
 Religion que luy. Il y voulut  
 disposer cette fiere Esclave, en  
 commençant de luy donner de  
 l'estime pour le Galand, qu'il  
 luy preparoit. Il avoit déjà parlé  
 plusieurs fois de luy dans la  
 Chambre de la Sultane, où Laura,  
 c'est ainsi qu'elle s'appelloit, s'e-  
 stoit toujours rencontrée; mais  
 depuis le dessein qu'il eut pris,  
 il ne les entretenoit plus d'autre  
 chose. C'estoit toujours Alex-  
 andre qui fesoit cecy, ou Alex-  
 andre, qui disoit cela; & il en

donnoit un portrait si agreable & si charmant, que pour peu qu'une femme fust fufceptible, il falloit, qu'elle l'aimât.

Le Comte ne fçavoit rien de tous ces bons offices, qu'on luy rendoit. Le Bassa luy disoit quelque fois en riant fur son air triste & melancholique, qu'il verroit bien tôt changer d'humeur : fibienqu'un jour, qu'il crut, avoir affez bien difpofé les chofes du costé de Laura, qui luy avoit tefmoigné, qu'elle ne feroit pas fâchée de voir ce Chrestien, il le mena se promener avec luy dans le jardin du ferrail; & apres avoir fait quelques tours d'allée, il luy demenda, s'il n'avoit jamais aimé. Cette question surprit un peu le Comte, qui crut, comm'il estoit dans un Pays de gens fort foupçonneux, que le Bassa avoit peut-être conceu quelque

quelque jalousie de luy ; quoy-  
 qu'il ne luy semblât pas de luy  
 en avoir jamais donné aucun su-  
 jet. Il s'imagina de là , qu'il  
 estoit necessaire, pour le desabu-  
 ser, d'affecter une grande indif-  
 ference de cœur sur le Chapitre  
 des femmes : & en effet jùsques  
 là il n'avoit jamais esté guere  
 amoureux : Mais ce n'estoit pas  
 bien faire sa Cour à un Seigneur,  
 qui panchoit extremement de ce  
 costé-là : Neanmoins il aima  
 mieux faire une faute de Cour-  
 tisan, que de luy donner le moin-  
 dre sujet d'ombrage. Le Bassa  
 luy dit de prendre garde à luy,  
 que l'amour s'en vengeroit quel-  
 que jour ; & que pour luy il ne  
 desesperoit pas de le voir amou-  
 reux en Barbarie. Vous estes  
 jeune, bienfait, poursuivit il, vous  
 avez de l'esprit ; & il y a icy  
 des Dames dangereuses aussi bien

-qu'en Europe, qui ont peut être  
 des desseins sur votre liberté; &  
 vous n'estes pas encore sorty de  
 Tunis. Un discours si nouveau  
 pour le Comte, & l'air dont le  
 Bassa luy parloit l'embarrafferent  
 tellement, qu'il ne sceut d'abord  
 que luy répondre. Ce Selgneur  
 qui prenoit un tres grand plai-  
 sir au desordre, où il le mettoit,  
 Quoy l'amour, continua-t-il,  
 vous semble-t-il si terrible, qu'il  
 le faille fuir? Vous qui estes le  
 plus brave de tous les hommes,  
 en auiez-vous peur? Rassurez-  
 vous, adjouta-t-il, & croyez  
 qu'il n'est pas tant à craindre  
 dans ce pays, que dans le vôtre.  
 Si chez vous il va armé de traits,  
 il n'est couvert chez Nous que  
 de fleurs. Rien n'est moins cruel  
 que l'amour parmy les Turcs.  
 Les femmes y sont douces & hu-  
 maines; & jamais homme, que  
 je



je ſçache, n'y eſt mort de cette paſſion par la faute oû par la cruauté d'une femme. Il n'y a de la peine, qu'a trouver le moyen de les voir ; mais ce pas eſtant fait, le reſte ne couſte plus rien. Les mêmes ſcrupules, que vos Dames ſe font pour favoriser un Amant, on les a icy, de les faire languir : & le tittre de cruelle & d'inſenſible y eſt auſſi odieux, que parmy vous celui de galante. Le loy de Nature eſt la premiere, que nous ſuivons preſerablement a celle de Mahomet ; parceque nous ſommes hommes, auparavant que d'eſtre autre choſe. Nous devons a la beauté de femmes des ſoins & de la tendreſſe ; Elles nous doivent par retour de la complaiſance & du ſecours ; & ceux qui n'approuveront pas ces maximes, ne meritent pas, de gouſter jamais les plaiſirs de l'amour. Je ſçay,

ſçay, continua-t-il, qu'en Europe,  
 vous traitez cette Paſſion d'une  
 maniere tout à fait extraordi-  
 naire, que vous faites un mar-  
 tyre, de ce qui eſt l'objet de nos  
 plaiſirs : mais je voudrois bien  
 ſçavoir, quel eſt le deſſein d'une  
 femme, qui voit ſoupirer tous les  
 jours un homme à ſes genoux, &  
 qui deſire la même choſe que luy,  
 & peut être plus fortement ; car  
 les paſſions ſont également puis-  
 ſantes dans l'un & dans l'autre  
 ſexe. Pourquoi le laiſſer ſouffrir ?  
 Pourquoi tant de ſoupirs & tant  
 de larmes ? aime-t-on pour cela ?  
 Le Comte qui avoit eu le tems  
 de ſe remettre durant tout ce  
 diſcours, Seigneur ; luy dit il, je  
 crois, qu'il eſt de l'amour, comme  
 de toutes les autres choſes, que  
 chacun à ſon gouſt & ſes max-  
 imes : mais s'il m'eſt permis, de  
 dire mon ſentiment la deſſus,  
 quoyque

quoyque je n'aye jamais esté a-  
 moureux, j'assureay premiere-  
 ment, que quand on est né sous  
 quelque Loy, on s'en fait insen-  
 siblement une habitude, qui nous  
 la fait supporter sans peine : &  
 j'adjoute de plus ; & je suis cer-  
 tain, qu'il est vray, qu'il y a plus  
 de douceur & plus de charmes au  
 milieu des tourmens, que nous  
 souffrons dans nostre façon d'ai-  
 mer, qu'au milieu de tous vos  
 plaisirs, qui ne vous coustent  
 rien. Ne vous imaginez pas, Seig-  
 neur, que tous ces maux soient si  
 grands & si cruels, que nos A-  
 mians les representent ; ce n'est,  
 qu'a fin de mieux toucher leurs  
 maistresses. Vous seriez sans  
 doute bien surpris, si vous les  
 entendiez crier, *Redouble, Amour,*  
*redouble une peine si chere* : Tant  
 ils trouvent du plaisir à souffrir,  
 de la maniere qu'ils souffrent. Le  
 Bassa

Bassa charmé de l'entendre parler, ne voulut point l'interrompre : si bien qu'il poursuivit de cette façon. Quelle satisfaction pouvez vous trouver dans un amour, qui n'a pas le moindre trait qui pique, qui est fade & sans assaisonnement : quel divertissement avec un Enfant sans esprit & sans malice, & qui se laisse faire, tout ce que vous voulez. Le Bassa ne peut s'empêcher de rire icy ; & de luy dire, que si luy vouloit persuader, que l'amour, qui fesoit le plus souffrir estoit le plus charmant, il falloit qu'il luy en fist, voir une épreuve en luy même : Qu'il aimast ; & qu'il le vist souffrir avec plaisir tous les maux, dont il luy parloit. Puisque je n'ay pas esté amoureux dans mon Pays, luy répondit Alexandre, ou vous sçavez, Seigneur, qu'on a une honneste

neste liberté de vivre avec les  
 femmes, il est a croire, que je ne  
 le deviendray pas dans celuy-cy,  
 cù il ne nous est pas seulement  
 permis, de les voir. Il y aura  
 moyen; luy repartit le Bassa, de  
 vous contenter la dessus, si vous  
 le desirez. Je ne suis pas d'avis,  
 luy repliqua le Comte en riant,  
 de me faire brusler pour si peu;  
 ni de changer ma Religion. Non,  
 non, reprit le Bassa, c'est avec  
 une Chretienne que j'entens, &  
 que je veux que vous lassiez  
 connoissance. Mais une Che-  
 stienne que j'ay trouvée autrefois  
 fort belle; & qui n'est pas in-  
 digne de vos sôûpirs. Si j'estois  
 de vôtre goust; si j'avois aimé  
 les peines a la façon des Amans  
 de vôtre Pays, j'aurois bien  
 trouvé mon affaire; car Elle m'a  
 fait languir aprez Elle plus de  
 trois mois; mais lassé à la fin  
 d'une

d'une maistresse si peu sensible, j'ay eu recours a d'autres de mon humeur. C'est une fille tres bien faite, qui vous charmera de son esprit; mais fiere, cruelle, comme vous les voulez. En un mot, c'est ce qu'il vous faut. Il y aura quelque difficulté pour la voir; parce qu'elle est auprez de la Sultane, qui, depuis qu'elle a sçeu l'inclination, que j'avois pour Elle, n'a jamais voulu permettre, qu'elle soit sortie de son appartement: mais je vous y meneray moy même deguisé en Eunuque, qui est la seule forme, sous la qu'elle vous pouvez entrer dans le ferrail. Vous estes jeune; & de nuit vous passerez assez facilement pour tel. Le Comte luy rendit mille graces de tant de bonté. Non pas, qu'il ne se fust bien passé de cette nouvelle faveur, n'ayant pas trop d'envie,  
de

de faire connoissance, ni de s'attacher dans un pays, ou il ne séjourneroit, que le moins qu'il pourroit. Neanmoins la complaisance qu'il devoit au Bassa, & quelque curiosité encore, de voir une Esclave, qu'il fesoit si belle, la luy fit accepter avec quelque sorte de joye.

Il se rendit donc, aprez la quatrième priere, auprez de son cher Patron, qui estoit l'heure, qu'il alloit ordinairement au serail : il y prit un habit d'Eunuque, qu'on luy avoit préparé ; & le suivit de cette maniere chez la Sultane. D'abord en entrant, ils trouverent Laura, qui les attendoit, & qui avoit esté advertie de leur venuë. Le Bassa l'abborda en souriant, & luy dit tout bas à l'oreille, qu'il luy amenoit un Eunuque, qui luy pourroit apprendre des nouvelles de son

E                      Pays ;

Pays; Qu'il la prioit, d'avoir soin  
 de luy, & de le traiter comme une  
 Personne qu'il aimoit chèrement.  
 Laura se prennant aussi a rire, luy  
 répondit, qu'il luy en rendroit  
 bon compte. Le Comte, malgré  
 tout son deguifement, estoit  
 facile à connoistre, que quand le  
 Bassa n'auroit rien dit a Laura.  
 Elle l'auroit toujours fort bien  
 reconnu à sa bonne mine. Il n'y  
 avoit point, je ne dis pas d'Eunuque,  
 mais de Turc qui eust vu  
 air comme luy. Elle luy donna  
 la main pour le mener dans une  
 Chambre, ou ils ne fussent pas ex-  
 posés a la veüe des Passans. Je  
 ne sçay, luy dit Elle, Seigneur,  
 quelle grace, je pourray rendre  
 au Bassa, de celle qu'il me fait, de  
 l'honneur de vous voir: Car il  
 n'y entre jamais icy d'autre homme  
 que luy, & des Eunuques, dont  
 il vous a fait prendre l'habit. Je



ne le puis attribuer, qu'à cette grande affection qu'il a, & qu'il nous tesmoigne tous les jours d'avoir pour vous. Il est vray, Madame, luy répondit le Comte, que la bonté, que ce Seigneur a pour moy, est extreme; mais si quelqu'un de nous deux doit estre en peine de le remercier, comm'il faut, c'est moy assurément, apres la faveur qu'il vient de me procurer. Jevoudrois bien, continua-t-il, ne la luy devoir pas toute entiere; & qu'il fust vray, comm'il m'avoulu faire accroire, que vous y eussiez contribué. Je ne vous mantiray point, luy repartit Laura, je luy ay assez fait connoistre, que je souhaitois cette grace de luy. On nous à fait entendre des choses, si glorieuses de vous, il nous en à raconté luy même de si avantageuses, qu'il ne faudroit

pas avoir guere de curiosité, sur  
 tout une fille comme moy, qui  
 suis reduite a ne voir personne  
 depuis trois ans que je suis icy,  
 pour n'avoir pas quelque envie de  
 connoistre un homme, generalle-  
 ment estimé de tous les autres.  
 Madame, ce Pays, repliqua le  
 Comte m'est beaucoup favorable  
 sur une reputation, que j'auray  
 peut être assez de peine de me  
 conserver auprez de vous. Ce  
 n'est pas ce que vous craignez,  
 sans doute, luy dit Laura, &  
 vôtre bonne mine, ne confirme  
 que trop le bruit qu'on fait de  
 vous. Mais sçavez-vous, con-  
 tinua-t-elle en souriant, pour  
 changer de discours, qu'il est  
 quelquefois dangereux, parmi  
 une Nation comme celle-cy d'y  
 faire tant parler de soy; si ce  
 n'est pas du costé des hommes,  
 c'est de celuy des femmes, qui y  
 devi-

deviennent amoureuses sur le simple rapport, qu'on leur fait des gens. Ce ne sera pas vous, Madame, luy répondit le Comte, en riant aussi, qui serez de ces sensibles; je ne suis pas assez heureux pour cela. Et pour quoy? luy repartit Elle, ne pourroit-ce pas estre moy, puisque j'ay tant souhaitté de vous voir. Non, non, poursuivit elle, sans luy vouloir donner le loysir de luy répondre, nous n'avons pas du tems à perdre; & j'ay a vous dire que vôtre fortune est meilleure, que vous ne pensez. Je fais pour une autre, ce que peut-être je ne ferois pas pour moy même. Le seul desir de voir un homme est compté icy pour une grande avance d'amour; parce que voir & conclurre est la même chose. Cependant je m'y suis exposée, & j'ay peut-être

fait croire au Bassa, que j'avois des sentimens favorables pour vous. Mais pour ne vous faire pas languir à vous dire, pour qui j'ay eu tant de complaisance, vous sçaurez que c'est pour la Sultane Aliié la femme du Bassa. Elle a eu assez de confiance en moy, pour ne me cacher pas ce secret ; & l'amitié que j'ay pour Elle, n'a pas souffert, que j'aye balancé un moment à luy rendre ce service, d'abord que j'en ay trouvé l'occasion. Je crois, que vous avez ouï parler de sa beauté : il n'y en a jamais eu, qui ait tant fait de bruit dans ce Royaume : on peut dire aussi, qu'il n'y en eut jamais de plus achevée : Et pour l'esprit, c'est le plus doux & le plus aimable, qu'il est possible d'imaginer. On diroit à la voir, qu'elle a du panchant à l'amour, à cause de certain air de langueur  
&

& de tendresse qui est répandu sur tout son visage; mais cela est naturel aux femmes de ce Pays; & c'est la premiere chose qu'on leur apprend que de soupirer & faire les languissantes. Neanmoins ces foibleesses, s'il y en a dans les soupirs & dans les langueurs, ne m'ont paru en Elle que sur vôtre Chapitre. Mais pour prendre les choses dans leur source, je vous diray que le Bassa au retour du voyage, qu'il fit a Constantinople, pour les affaires qu'il avoit avec le Roy & le Divan, estant autorisé par la Porte dans les charges, que son pere luy avoit laissées, & qu'on luy disputoit, le Roy fut conseillé, pour faire une veritable reconciliation avec luy, de luy donner sa fille en mariage. Alhié avoit alors seize ans: Elle estoit dans sa plus grande beauté; & selon que j'en puis

puis juger aujour-d'huy, il n'est pas d'homme qui la peust voir sans l'aimer : mais ces mariages de politique & d'interest d'estat, a quoy les filles des Grands sont sujettes d'estre sacrifiées, n'ont pas ordinairement un destin fort heureux. Le Bassa épousa Alhié, & l'aima peut être huit jours : apres cela, il retourna a ses premiers attachemens ; & quitta, pour des mediocres beautez, la plus belle femme du Royaume. Il est vray, que cette maxime est fort commune dans ce Pays, où les hommes ayment plus leurs maistresses que leurs femmes ; où ils se font un poison de cette obligation de les aimer. Mais je crois, que cellecy du moins devroit estre exceptée, ayant assurément de quoy contenter toute la passion d'un honneste homme. Cependant Elle est aussi malheureuse

heureuse que les autres : car le Bassa, qui d'ailleurs est un fort galant homme, à peine la voit une fois le mois. Ce n'est pas, qu'il n'ait pour Elle tous les égards & tout le respect du monde; & qu'à l'amour prez, Elle ait sujet de se plaindre de luy; mais ostez l'amour à l'hymen, le reste est bien peu de chose. Vous pouvez croire, quel depit celâ fait, à une jeune femme, qui sçait ce qu'elle est, qui se voit mesprisée, du costé qu'elle est la plus sensible : Elle qui se feroit une felicité d'estre aimée; & qui croit de le meriter : il faut estre femme pour bien comprendre la rigueur d'un pareil traitement. Mais pour en venir, à ce qui vous regarde, vous scaurez que la Sultane a eu toujours beaucoup d'inclination pour les Chrestiens; & que son plus grand plaisir,

fir, quand je suis avec Elle, c'est  
 de me faire raconter des histoires  
 de mon Pays, dont Elle est si  
 estonnée, sur tout, quand je luy  
 parle de la liberté avec laquelle  
 les hommes vivent avec les fem-  
 mes, qu'elle à souhaitté mille  
 fois, d'avoir un sort pareil au  
 mien; & de tomber entre les  
 mains de quelque honneste Chre-  
 stien, qui la voulust conduire dans  
 ce Pays-là. Il est vray, qu'il vau-  
 droit beaucoup mieux, pour une  
 femme, d'estre Esclave parmy  
 nous, que d'estre libre parmy les  
 Turcs: Parceque leur vie, n'est  
 autre chose, qu'une perpetuelle  
 Esclavitude. Toutes ces avan-  
 tures, soit d'amour où de galan-  
 terie, que je luy racontois, & qui  
 la charmoient si fort, luy avoient  
 donné une telle envie de voir  
 quelqu'un de ceux, que j'appel-  
 lois des Personnes de merite &  
 de



de qualité, qui estoient si galans  
& si bien-faits, que vous ne  
fûtes pas plustôt arrivé en cette  
ville, qu'elle se fit une joye de  
me venir dire, que le Bassa venoit  
d'achepter un Chrestien; dont  
on disoit mille merveilles. Je me  
mis à rire; & luy demenday, si  
ce n'estoit pas d'un homme,  
comme celuy-là, qu'elle eust sou-  
haitté de devenir Esclave. Elle  
rougit; & se prennant à soupirer,  
qui sçait, me dit Elle, en se tour-  
nant d'un autre costé, ce qui peut  
encore arriver, & si la fortune ne  
l'envoit pas icy pour moy. Ce  
jour là, Elle me fit coucher avec  
Elle, pour l'entretenir toute la  
nuit sur cela: & le lendemain  
le Bassa nous ayant confirmé le  
bruit, qui couroit de vous; & y  
ayant même adjouté plusieurs  
loüanges, sur les qualitez de vô-  
tre Personne, nous ne parlamez  
durant

durant plusieurs jours , Elle & moy d'autre chose. Comme l'amitié, qu'elle a pour moy , me rend un peu familiere avec Elle; & qu'icy on ne garde pas tant de meures avec les Grands, je luy fesois quelque fois la guerre sur la tendresse, qu'elle avoit pour un homme, qu'elle n'avoit jamais vû. Je t'avoüe, me disoit elle, que ce seroit aller un peu trop vite en amour, si nous en usions, comm'on fait entre les Chrestiens: mais aprez le portrait, que le Bassa nous a fait de celuy-cy, il n'est point de femme dans ce pays, qui ne fût sensible pour luy, plus que je ne le suis: & je te répons, qu'il n'en voudroit pas dire autant devant la moindre de ses maistresses. Mais comm'il me neglige, qu'il ne se soucie guere de mes sentimens, il ne mesnage pas mon cœur. Vous  
 VOUS

vous estimeriez bien-heureuse, luy dis-je, Madame, si vous estiez aimée d'un Chrestien comme ce-luy là. Plus heureuse, reprit Elle d'abord, que tu ne sçauois t'imaginer : & je t'assure que je prefererois la condition d'une simple Dame Chrestienne, à celle de ce que je suis. Et de quoy me sert, adjouâta-t-Elle, d'avoir tant de Richesses, de recevoir tant d'honneurs, d'estre fille de Roy & femme d'un Bassa, si avec tant de biens, mon cœur n'est pas content ; s'il ne peut faire, ce qu'il veut ; s'il ne peut aimer, ce qui merite de l'estre : En un mot, si je ne suis rien moins, que ce qu'on me croit ; mais plustôt une Esclave mille fois plus mal-heureuse, que ceux qui sont à la chaisne. Pauvre Laura, poursuivit Elle, en m'embrassant, que je te plains, toy qui sçais, & qui

as goûté les douceurs & la liberté de ton Pays, de te voir dans celuy-cy, où les femmes, de quelle condition qu'elles soient, sont traittées d'une maniere si fort indigne d'Elles.

Voyla à peu prez les' entretiens que nous avons eu, depuis que l'on a parlé de vous à Tunis. Le Bassa qui venoit voir un peu plus souvent la Sultane, sans que nous ayons pû sçavoir pour quoy, nous apportoit presque toujours de vos nouvelles ; & comm'il vous aime beaucoup, il se fesoit un plaisir de nous dire tout ce que vous faisiez. Peut-être, que s'il eust sçeu les dispositions favorables, qu'il y avoit pour vous dans le cœur de la Sultane sa femme, il ne nous en auroit pas tant dit. Je crois du moins, qu'il ne pretendoit pas, en parlant obligeamment de vous,  
faire

faire rien contre luy. Mais c'est  
 toujours sa faute, qui est moins  
 pardonnable qu'à personne, à un  
 homme comme luy, qui sçait si  
 bien ce que c'est, que des femmes  
 de ce Pays. Vous pouvez croire  
 que de si belles Relations, qui  
 venoient de si bonne part, ne fu-  
 rent pas sans effet. La Sultane  
 en fut touchée; si bien que, ce  
 qui n'estoit du commencement  
 qu'une inclination de cœur, de-  
 vint à la fin une passion formée.  
 Son humeur, qui jusques là avoit  
 esté fort egale & plus enjoiée  
 que melancholique, changea tout  
 d'un coup. Elle ne fesoit plus  
 que soupirer, rever, se plaindre,  
 dont j'avois grand pitié, moy qui  
 seule connoissois son mal. J'ap-  
 prehendois extrêmement, qu'elle  
 ne tombât dans une certaine ma-  
 ladie, qu'en ce Pays on appelle  
*Fantaisie*, qui est une espece de

melancholie noire, dont les femmes & les hommes se trouvent quelque fois si accablez, qu'il y en a, qui en meurent. Je voulus travailler à luy guerir l'esprit de cette Passion, en luy representant tous les obstacles, qui s'y rencontroient, pour ne devoir jamais esperer d'estre heureuse; mais ce fut trop tard, Elle s'estoit même dit, tout ce que je luy pouvois dire, & je ne fesois que l'accabler davantage: de maniere que, voyant, qu'il n'y avoit plus de remede de ce costé là, je voulus tourner mes soins d'un autre, & me mis à la flatter sur des esperances, ou je ne voyois pas moy même le moindre rayon de lumiere: mais il estoit necessaire de la tromper, de peur que le mal n'empirât. En fin je ne sçay, comm'il est arrivé, que le Bassa m'ayant parlé  
de

de vous, il y a deux jours, comm'il fait bien souvent, quand il me rencontre seule, je luy fis comprendre que j'aurois bien de la joye de vous voir, si cela se pouvoit faire sans bruit & sans scandalle. Je fus la plus esionnée du monde de la facilité, qu'il eut, a me le promettre; & en verité je ne m'y serois pas attendue, si je n'eusse sçeu, que c'estoit un homme fort exact a sa parole.

Le Comte apres avoir escouté Laura durant tout ce discours avec une merveilleuse attention, & l'avoir remerciée de tous ses bons offices, & répondu à tout ce qu'elle luy avoit dit d'obligeant de la part de la belle Sultane, luy aprit le dessein du Bassa, & le sujet pourquoy il l'avoit améré avec luy; de quoy Laura fut fort ravie, quoyqu'elle

Vist bien, qu'il y avoit grand hazard, qu'il n'y allast pas un peu du sien, preterant la satisfaction de sa maistresse, a tout ce qui luy pouvoit arriver a Elle même. Mais pour achever de vous tout dire, continua-t-elle, apres avoir remercié le Bassa de la grace, qu'il me fesoit esperer, j'en allay d'abord porter la nouvelle à la Sultane, qui ne peut assez m'embrasser, si transportée de joye, qu'a peine rien au monde ne luy en pouvoit tant donner. Elle n'en a pû dormir depuis : nous avons fait cent desseins, nous avons eu cent imaginations sur le moyen que nous trouverions, qu'elle vous peût voir : mais à moins, que le Bassa ne vous laisse venir seul, je ne crois pas, que nous y puissions reussir. Cependant Elle sera ravie d'ayse, que je vous aye veu ; & que vous

fça.



ſçachiez une partie des ſentimens  
qu'elle a pour vous.

L'heureux Romain charmé des  
bontez, qu'une ſi belle Perſonne  
& de cette qualité avoit pour luy,  
chargea Laura avec beaucoup de  
ſoin & d'ardeur, de vouloir l'ob-  
liger dans cette occaſion ; & de  
dire pour luy à la Sultane, tout  
ce qu'un cœur extrêmement ſen-  
ſible à la grace, qu'elle luy feſoit,  
eſtoit capable d'exprimer : Qu'il  
ſe croiroit le plus heureux de tous  
les hommes, ſ'il avoit pû meriter  
cet honneur ; mais qu'il tâche-  
roit de ſ'en rendre digne par  
toutes les actions de ſa vie. Elle  
ſouhaitte ſeulement de vous, Seig-  
neur, luy repartit Laura, que  
vous vueilliez, ſi bien meſnager  
la liberté, que vous donne le  
Baſſa, qu'elle vous puiſſe voir  
une fois. Je m'y ſens engagé,  
repliqua le Comte, par tant de  
raiſons,

raisons, que vous devez estre persuadée, que je n'oublieray rien, pour avoir cet honneur. Je vous prie d'en assurer la Sultane; & que j'en ay pour le moins autant de passion qu'elle. Comm'ils en estoient la dessus, le Bassa arriva, qui leur fit changer de conversation, à laquelle il se messa, & les raillant tous deux fort agreablement, il leur dit, qu'il voyoit bien sur leurs visages, qu'ils luy estoient fort obligez de la connoissance, qu'il leur avoit procurée, & qu'ils estoient fort contents l'un de l'autre. Le Comte & Laura répondirent tour à tour à cette galanterie: ensuite de quoy, le Bassa prenant congé de cette belle, ils sortirent du ferrail.

Ce Seigneur avoit remarqué, je ne sçay quelle joye sur le visage d'Alexandre, quand il estoit au-  
prez

prez de Laura, qui luy fesoit  
 conjecturer qu'il estoit fort con-  
 tent de la visite, qu'il luy avoit  
 rendue. Il fut curieux nean-  
 moins, de luy demander, com-  
 ment il s'en trouvoit; & si Elle  
 estoit aussi belle à ses yeux,  
 qu'il la luy avoit représentée. Le  
 Comte luy répondit, qu'on ne  
 pouvoit pas voir assurément une  
 fille mieux faite, ni qui eust plus  
 d'esprit, comm'il luy avoit dit;  
 & qu'il se sentoit fort charmé  
 de sa vue, & de sa conversation.  
 Le Patron, qui ne desiroit rien  
 tant au monde, que de le voir  
 amoureux, fut ravy de joye de  
 cet aveu: & luy dit, qu'il ne  
 tiendrait qu'à luy, de la revoir  
 encore; & que s'il le souhait-  
 toit, ce seroit dès le lendemain:  
 Qu'il luy donneroit une clef pour  
 entrer dans le ferrail; & qu'il y  
 pourroit aller seul; parce que ce  
 n'estoit

n'estoit pas sa coustûme, de rendre des visites si frequentes à la Sultane, qui en pourroit prendre de l'ombrage. Le Comte ne manqua pas de luy tesmoigner qu'il luy seroit extremement obligé, de la faveur qu'il luy feroit : de sorte que, le Bassa luy dit, qu'il n'avoit qu'à s'aller coucher, & de reposer la dessus, qu'il verroit Laura le lendemain à la même heure, qu'il l'avoit veüe ce jour là.

Jamais homme, n'a passé une nuit plus pleine d'inquietudes, que fit le pauvre Comte. Une inclination, comme celle là, qu'il alloit faire avec la premiere & la plus belle femme du Royaume; estoit quelque chose de si rare & de si engageant pour un jeune homme de son humeur : Tout ce que Laura luy avoit dit des sentimens obligeans, que cette charmante

mante Personne avoit pour luy,  
 le ravissoit tellement de plaisir,  
 qu'il ne croyoit pas dans sa mau-  
 vaise fortune, qu'il y eust homme  
 plus fortuné que luy : mais quand  
 il venoit à songer, que c'estoit la  
 femme du Bassa, d'un Seigneur  
 à qui il avoit de si estroites ob-  
 ligations, il en soupiroit de re-  
 gret ; & ces derniers sentimens  
 l'emportant alors sur les autres,  
 il se fesoit mille reproches, d'a-  
 voir eu seulement la pensée d'une  
 si lâche ingratitude. Cependant,  
 comme c'est une chose assez de-  
 licate, que de se repentir, de ce  
 qui nous charme ; & qu'on ne se  
 dit pas, tout ce qu'on se devoit  
 dire, sur un sujet qui plait, & qui  
 est si aimable, comme le plaisir  
 d'estre aimé, ces reproches n'e-  
 stoient pas toujours les plus  
 forts, & il estoit fâché quelque-  
 fois contre luy même, de s'en  
 estre

estre tant fait. En fin combattu  
 tour à tour & du costé de la rai-  
 son, & du costé du cœur, de  
 celui de la gloire & de celui de  
 la tendresse, il se leva sans avoir  
 pû prendre d'autre resolution,  
 que celle, de se laisser conduire  
 à son destin. C'est à dire, de  
 vivre la dessus à la Turquie, & de  
 voir la Sultane, s'il estoit écrit,  
 qu'il la deust voir; mais de ne  
 rien faire pour cela, quoyqu'il  
 eust promis à Laura, d'y contri-  
 buer, tout ce qu'il pourroit de  
 sa part; & qu'il eust tesmoigné  
 au Bassa, qu'il seroit ravy d'ayse  
 de retourner au serrail.

Il y eut des momens où sa re-  
 solution se trouva bien foible.  
 Il est presque toujours inutile  
 d'en prendre contre l'amour. Il  
 souhaitta mille fois dans ce jour,  
 que son destin, sur le quel il s'e-  
 stoit reposé, de ce qu'il devoit  
 faire,

faire, panchât du costé de la Sultane. Il en attendoit l'heure avec une extreme impatience, quoy-qu'il tachast de se persuader que non. L'insensibilité n'est pas pour un jeune cœur. Tout y est si disposé a prendre feu, qu'il ne faut presque rien pour l'enflamer.

Le soir, d'abord que le Bassa eut vû le Comte, il luy montra en riant la clef du serail; & luy la receut avec la plus grande joye du monde. Je ne vous la donne, luy dit il, qu'a condition, que vous me ferez vôtre confident. Il me semble, continua-t-il, que j'ay assez fait pour vous, pourque vous ne puissiez pas me refuser ce plaisir. C'estoit déjà l'heure, qu'il falloit aller chez la Sultane: & le Comte ayant pris son habit d'Eunuque, son Patron toujours plus obligeant voulut bien l'ac-

compagner jusqu'au ferrail. Laura, qui avoit esté avertie de sa venue, l'attendoit, il y avoit plus d'une heure, a la porte ; & Elle ne le vit pas plustôt arriver, que toute ravie de joye, vous estes, luy dit Elle, en luy donnant la main, où le plus adroit, où le plus heureux de tous les hommes. Vous venez à bout de certaines choses si difficiles & en si peu de tems, qu'il semble, que tout contribuë, à vous favoriser. J'en dois rendre graces à la fortune, luy répondit le Comte ; car pour d'adreste, je vous assure, que je n'y en ay mis aucune ; mais si vous voulez, que je croye, que je suis aussi heureux, que vous dites, faites moy voir la Sultane. Laura luy dit, qu'il en auroit bien tôt des nouvelles ; & le mena dans une Chambre, où sa maistresse avoit coustume de recevoir



cevoir les Dames, qui luy venoient rendre visite. Il y avoit une Espece d'Alcauve, où Elle se mettoit, & où l'on n'entroit que de sa Chambre, estant fermée d'un grand Balustre tout doré, convert d'un rideau d'une estoffe de soye fort deliée, au travers du quel, elle pouvoit voir celles, à qui Elle ne vouloit pas faire l'honneur, que de se montrer, qui est une maniere de grandeur dans ce Pays-là.

Laura dit au Comte, que la Sultane le verroit derrière ce Rideau : & moy, luy répondit-il, je n'auray donc pas l'honneur de la voir. Je ne sçay ; luy repartit Laura, mais c'est une faveur bien grande, & qu'on n'accorde guere, que quand on veut tout accorder. Ah ! je vous supplie, Madame, luy dit le Comte, demandez luy cette grace pour moy :

dites luy, qu'elle ne tire a aucune consequence avec un estrangier ; & que j'en mourray de regret, si elle ne me fait pas cét honneur là. Laura luy promit d'y contribuer de son costé, tout ce qu'elle pourroit ; & le laissant pour un moment, Elle fut advertir la Sultane, qui languissoit sans doute aprez Elle, pour apprendre l'arrivée de son cher Chrestien.

Dans ce tems là, le Comte s'amusa à considerer la richesse & les ornemens de cette Chambre, qui estoit une des plus magnifiques de l'appartement. Elle estoit esclairée de quatre lustres de cristail, qui fesoient le plus bel effet du monde sur l'or & les pierreries, qu'on voyoit briller de par tout. La Sultane n'eut pas plustôt vû Laura, qu'elle connut sur son visage l'heureuse nouvelle, qu'elle luy apportoit ;  
&

& sans luy donner le tems de luy rien dire. Elle passa à l'Alcauve, d'ou elle avoit dessein d'examiner ce Chrestien, avant qu'il sceust, qu'elle y estoit; mais Elle fit trop de bruit en entrant, & le Cavallier luy fit bien connoistre, qu'il s'en estoit apperceu, en la saluant, comm'il fit, à la Turque. Laura arriva en même tems de l'autre costé, qui s'apptochant du Balustre, se mit à parler tout bas avec la Sultane, qui ne pouvoit luy exprimer assez le plaisir qu'elle avoit de voir ce Chrestien, & combien elle estoit charmée de sa Personne. Pour luy, il estoit fort embarrassé dans une visite de cette nature, cù il ne pouvoit ni voir, ni parler. On le pria d'aller, de venir, de se tourner, mais las à la fin de ce manège, comme du silence, il s'approcha du Balustre, & s'adres-

fant à la Sultane même, dont il voyoit l'ombre au travers de ce rideau, il luy dit mille jolyes choses, mille galanteries pour l'obliger de se laisser voir. Elle entendoit fort bien l'Italien & ne le parloit pas mal. Laura le luy avoit appris, depuis qu'elle estoit auprez d'elle. C'estoit pour Elle un tres-grand plaisir, que d'oüir tout ce que le Comte luy disoit : Elle en rioit de tout son cœur ; mais elle ne luy répondoit pas & le rideau demouroit toujouis dans le même estat. De quoy l'impatient Chrestien, qui contoit pour des momens perdus, tous ceux qu'il passoit de cette maniere, fit semblant de se fâcher ; & luy dit d'un air assez libre & enjoué, qu'il alloit mourir de fantaisie comme les gens du Pays, si elle ne luy accordoit pas cette grace, & qu'à la fin il

la

la prendroit, & qu'il leveroit luy  
n.ême cet incommode rideau.  
Comm'en effet il n'auroit pas  
manqué de faire, si Laura, qui  
avoit peur, que la Sultane ne le  
trouvast mauvais, ne l'en eust en-  
peché. Mais elle se trompoit  
bien, & sa maistresse luy en sçeut  
tres-mauvais gré.

C'est une maxime, parmy les  
femmes de ce Pays-là, qu'elles  
ne pécheront pas d'elles mêmes  
contre les regles de leur devoir ;  
mais si l'on les presse tant soit  
peu ; si l'on leur fait la moindre  
violence, elles succomberont sans  
peine, & ne résisteront pas. Elles  
s'excusent, sur ce que la Nature  
est foible en Elles, qu'on le sçait  
bien, & qu'on a tort de les pous-  
ser a bout : Que s'il y a du mal,  
c'est pour ceux, qui le leur font  
faire, & non pas pour Elles, qui  
ne le connoissent pas. Laura qui  
n'estoit

n'estoit pas si bien instruite dans le détour de cette maxime, fit une faute, en croyant faire son devoir. L'amoureuse Sultane auroit esté ravie de joye, que le Comte l'eust veüe; & cette Esclave alla tout gaster par un trait de prudence inutile. Mais sa maistrresse voulut repaier le coup, & satisfaire en quelque maniere à l'extreme desir, que son cher Chrestien avoit de la voir. Elle luy fit demender, ce qu'il souhaitteroit, pour le consoler de la rigueur des coustumes du Pays, qui vouloient, qu'il fust contre la bienséance du sexe, de se montrer à d'autres hommes, qu'à leurs epoux. Le Comte demenda d'abord, qu'elle luy fist du moins la faveur de luy laisser voir une de ses belles mains. Ce que la Sultane n'eut pas plustôt entendu, que levant un peu le rideau, elle  
en

en passa une au travers du Balu-  
 stre, pour la luy donner. Le  
 jeune Comte fut si charmé de  
 cette faveur, que cedant au  
 mouvement qui le transportoit,  
 il mit un genoux a terre, & se  
 jettant sur cette belle main, il y  
 cola sa bouche, & la baisa avec  
 tant de passion & tant de joye,  
 que la Sultane charmée de tous  
 ses transports se mit à luy serrer  
 la sienne, pour luy tesmoigner,  
 qu'elle les approuvoit. Comme  
 Elle ne se soucioit pas trop de  
 se cacher, elle ne se mesnageoit  
 guere; & ayant passé la main &  
 le bras dehors, il ne se peut faire,  
 que, de tems en tems, par des  
 coups de hazard, à quoy peut  
 être elle contribuoit, Elle ne se  
 fist voir en partie. Le Galand au-  
 roit bien voulu qu'elle luy eust  
 fait la grace toute entiere; mais  
 comm'il croyoit en avoir assez  
 obtenu

obtenu pour la premiere fois, il  
 n'osa pas en demander davan-  
 tage. Le plaisir que la Sultane  
 avoit, seulement de le voir, estoit  
 si grand & si charmant, qu'elle  
 auroit volontiers passé la nuit  
 avec luy; mais comme dans ce  
 pays-là, & sur tout au regard des  
 femmes, on est toujours sur les  
 soupçons; & qu'il y a mille sur-  
 veillans pour une, Elle eut peur,  
 que dans son appartement, on ne  
 se formalizât, de ce quelle de-  
 meuroit si long tems dans cette  
 l'Alcauve, n'estant pas l'heure  
 alors de recevoir aucune visite.  
 Et Laura luy dit aussi, qu'il estoit  
 tems de se retirer: néanmoins il  
 est toujours assez cruel, de se  
 separer, de ce qu'on aime, pour  
 ne le pouvoir faire sans peine &  
 sans regret. Elle avoit toujours  
 quelque petit pretexte, pour l'ar-  
 rester encore un moment, & puis  
 un



un autre. Sur la fin, Elle luy fit present d'une chaisne d'or, enrichie de quelques pierreries, & luy dit fort obligemment, qu'un Esclave comme luy, n'en devoit jamais porter d'autres.

L'heureux Comte plus satisfait de cette chaisne, que si on luy eust donné la couronne de Tunis, répondit à la galanterie & à la faveur qu'elle luy fesoit par les paroles du monde les plus passionnées & les plus reconnoissantes : & prenant congé d'elle, puis qu'il le falloit, il se retira avec Laura, qui l'accompagna jusqu'à la porte de l'appartement.

Le presens parmy les Turcs sont les premiers témoignages d'affection, qu'on reçoit : ils passent même quelquefois pour des declarations d'amour. Laura, qui ne l'ignoroit pas, apprit au  
Comte,

Comte, avant que de le quitter, ce que, celuy qu'il venoit de recevoir de la Sultane, luy vouloit dire; & qu'il ne devoit plus douter, aprez ce qu'elle luy avoit dit, & ce qu'il avoit vû luy même, qu'elle ne l'aimat fort tendrement. Mais qu'il prist garde à luy; parce qu'il falloit avoir de grands ménagemens avec les femmes de ce Pays-là, dans le cœur de qui cette Passion estoit quelque fois si violente, qu'elles ne gardoient aucunes mezu- res, quand Elles aimoient quelqu'un: Que la Sultane estoit a la verité une des plus raisonnables qu'elle eust veüe, & qui avoit le plus d'esprit; neanmoins tendre & passionnée comme les autres: Qu'elle seroit perduë & luy aussi, si le Bassa, qui estoit un homme experimenté en amour, venoit à avoir le moindre soupçon de leur in-

intelligence : Qu'il n'y avoit pas un homme dans tout le Royaume, qui eust les sentimens plus delicats sur l'honneur que luy, & que toute cette grande amitié ne le sauveroit pas de son indignation, s'il sçavoit seulement, que sa femme l'eust vû.

Quelque preoccuppé que fust nostre jeune Romain des agreables commencemens de cette passion, & quelque joye qu'il eust des tesmoinages de tendresse, qu'il venoit de recevoir, de la plus belle femme qu'il y eust sous le ciel, il ne laissa pas de faire reflection à tous les bons avis que cette Esclave venoit de luy donner. Il alloit revant par le ferrail à ce qu'il devoit faire & aux moyens, de s'opposer à une Passion si dangereuse, qui ne luy pouvoit attirer que des malheurs & de la confusion ; quand

H le

le Bassa , qui alloit chez quelqu'une de ses maistresses, le rencontra ; & le voyant passer, sans qu'il luy dist rien, ni qu'il le saluast, il se mit a rire, & le prenant par le bras, c'est maintenant, luy dit il, que je vois, que vous estes amoureux. Le Comte confus, qu'il l'eust surpris en cét estat là, s'excusa de la faute, qu'il venoit de faire. Le Bassa luy dit, que s'il vouloit, qu'il la luy pardonnât, il falloit, qu'il luy advouât la verité, qu'il avoit l'esprit & le cœur fort embarrassé du merite & de la beauté de Laura. Helas ! Seigneur, luy répondit il en soupirant, plus que je ne vous scaurois dire, plus que vous ne scauriez vous imaginer vous même. Il estoit déjà tard, & le Bassa ne voulant pas s'arrester, remit la confidence à une autrefois & le renvoya chez luy.

Ce

Ce fut un tres-grand bonheur, comm'un tres-grand plaisir, pour ce nouvel amant, qui n'estoit pas alors trop en estat de l'entretenir de toutes ces choses. Il passa une partie de la nuit à se promener dans sa Chambre, comme s'il ne se fust point voulu coucher, qu'il n'eust pris quelque resolution. La crainte de la mort, où de sa fortune n'estoit pas, ce qui luy fesoit le plus de peine; c'estoit l'horreur, qu'il avoit pour l'ingratitude; & apres les bienfaits, qu'il recevoit tous les jours du Bassa, il croyoit, que rien ne le pourroit excuser, de celle qu'il commettrait envers ce Seigneur, d'avoir des desseins injustes sur sa femme. Mais, disoit il apres, ne serois-je pas aussi le plus ingrat de tous les hommes de mépriser l'affection d'une si charmante Personne, a qui je dois, si

H 2

je

je considere bien les obligations selon ce qu'elles valent, mille fois plus qu'au Bassa : Et ne pourrois-je pas, continua-t-il, la voir & l'aimer dans des bornes, qui ne me rendroient coupable ni d'un costé ni d'autre. Non, non, adjouta-t-il, s'il y a de l'ingratitude en cela, je ne sçaurois m'en deffendre : Rien ne me justifieoit auprez de la Sultane, & l'amour me doit faire excuser auprez du Bassa.

Voyla quel fut le dernier combat, qu'il y eut dans l'ame du Comte entre les sentimens de reconnaissance & d'amour : Les derniers l'emporterent, comm'il arrive souvent ; & s'estant couché la dessus, il reposa fort bien le reste de cette nuit là. Le Bassa, qui avoit une extreme envie de le voir tout à fait enfoncé dans l'amour, qu'il ne s'en peust dire,

dire, fut le premier a luy parler, de retourner encore ce jour-là chez la Sultane. Il luy donna la clef du ferrail, & luy dit en riant, qu'il ne se pressât pas tant de revenir, s'il y trouvoit autant de plaisir, qu'il luy en souhaittoit : mais qu'il eust soin aussi, de ne prendre pas tant d'amour qu'il n'en donnast un peu a cette belle, où bien qu'il languiroit fort long tems inutilement, comme luy.

L'amoureux Italien fut donc au ferrail. Laura, qui l'attendoit, luy dit, d'abord qu'il fut arrivé chez la Sultane, qu'il pouvoit passer à la même Chambre, & qu'elle alloit advertir sa maistresse : mais l'impatience de cette belle ne luy avoit pas permis, d'attendre si long tems ; & Elle s'estoit déjà rendue à l'Alcave. Cét Amant, qui avoit une

extreme curiosité de voir, comment ce lieu estoit fait, se voulut prevaloir du tems, qu'il croyoit, que la Sultane n'y estoit pas ; & s'approchant du Balustre, il leva tout doucement le rideau : mais quelle surprise pour luy, de voir tout d'un coup cette charmante Personne dans la posture la plus capable de donner de l'amour, qu'une femme puisse estre veüe.

Je laisse la description de l'Alcauve, qui estant un lieu de Parade, pour la femme d'un si puissant Seigneur, on peut facilement se persuader que ce devoit estre quelque chose de bien riche & de bien galant. Elle estoit eslevée plus haut de la Chambre d'un pied, par une Estrade couverte d'un de ces beaux tapis de Turquie, & parsemée de quantité de carreaux de damas à fond d'or.



d'or. La Sultane estoit couchée sur un liét de ces carreaux, & comm'elle avoit eu dessein de se montrer ce jour-là au Cavallier, Elle n'avoit rien oublié pour se mettre d'une maniere à l'enchanter dès la premiere veuë. Elle avoit la Teste tournée du costé du Balustre, qu'elle appuyoit negligemment sur son Bras gauche, qu'on voyoit tout a nud dans une de ces grandes manches de gaze à la Turque. Ses cheveux noirs estoient en partie tressez avec des grands filets de Perles, & l'autre partie pendans la moitié sur sa belle George & l'autre sur ses épaules; & fesoient un merveilleux effet avec la blancheur de son Teint. Elle n'avoit qu'un petit corselet piqué d'or, pour luy serrer le corps. Son sein se soustenoit de luy même, n'estant qu'à moitié couvert d'une

d'une fine gaze, qui luy servoit d'Escharpe à la façon des Amazones. On voyoit cette admirable George ou tous les yeux des hommes se feroient perdus, si elle y eust esté exposée, comme à ceux du Comte. Sur la Teste elle avoit plusieurs plumes de diverse couleur, au milieu desquelles il y avoit un Croissant d'argent. Sa juppe estoit d'une estoffe assez legere avec quelque broderie d'or à la façon du Pays. Il y avoit deux agraffes de pierrieres pour la retrouffer sur le genouil. Sa jambe à demy-nuë estoit couverte d'un Brodequin tout chargé de Perles & de Diamans. Enfin tout estoit en elle si riche si galant & si plein d'enchantemens que le pauvre Comte acheva de se perdre. Il luy fit remarquer sa joye & son estonnement par un embarras d'action &

& de paroles, qu'il ne sçavoit, ce qu'il estoit devenu, ni ce qu'il luy vouloit dire. L'extasé ensuite le prit & se donnant tout à l'admiration, ses yeux & ses soupirs parlerent pour luy. La belle Sultane ayant un peu rougy, d'abord qu'elle le vit, voulut avec un mouchoir, qu'elle tenoit a la main, cacher une partie de sa confusion : mais cét heureux Amant, à qui le courage revenoit peu a peu, passant son bras au travers du Balustre, l'en empecha. Vous aviez raison, Madame, luy dit il, de me cacher de si aimables treshors, parceque vous sçaviez bien, qu'on ne les pouvoit voir sans mourir d'amour ; mais a cette heure il n'est plus tems. J'en ay plus vû, qu'un cœur n'en peut supporter sans se rendre ; & ce seroit une grande cruauté en vous, que de ne pas achever.

Pen-

Pendant que le Comte luy par-  
 loit de cette maniere, Elle le re-  
 gardoit avec des yeux si tendres  
 & si perçans, qu'il sembloit,  
 qu'elle vouloit executer, ce qu'il  
 luy demendoit. Le rusé Comte,  
 qui s'estoit saisy d'une de ses  
 mains, sur laquelle il appliquoit,  
 en la regardant, mille amoureux  
 baisers, la tiroit insensiblement  
 de son costé, & Elle s'y laissoit  
 foiblement aller, jusqu'a ce  
 qu'elle vint, appuyer sa Teste,  
 sur le Balustre, vis à vis de celle  
 de cét heureux Amant. Ce fut  
 alors, qu'il eut la liberté toute  
 entiere, de contempler à son  
 gré des beautez, qui le mettoient  
 dans des ravissemens, qu'il ne se  
 sentoît presque pas. Par mal-  
 heur les barreaux de ce Balustre  
 estoient un peu trop serrez; &  
 l'on ne pouvoit qu'a grand peine  
 passer entre-deux la moitié de  
 la

la Teste. Néanmoins, en faisant de checque costé la moitié du chemin, ils trouverent le moyen de faire couler par-la grand nombre de baisers aussi charmans & aussi savoureux, que jamais Amans ayent guosté. Le Comte, qui estoit naturellement fort hardy, aprez une liberté en prenoit une autre ; & voyant, qu'on luy laissoit faire, & qu'on y prenoit même plaisir, poussa sa temerité amoureuse si avant, qu'on pouvoit appeller, ce qu'il fesoit, une demy jcuissance. Jusques là, leur entretien s'estoit passé en l'engages muets, mille fois plus eloquens que les plus belles paroles du monde : c'estoient les yeux, c'estoient les soupirs, les baisers, les actions, les jeux, qui avoient parlé d'une façon tres intelligible, pour estre persuadez l'un & l'autre, qu'ils s'aimoient  
par-

parfaitement. Ils n'avoient pas besoin d'autre conversation : mais, comme Laura arriva, il la fallut un peu changer. Ils se dirent pourtant, devant elle, les choses du monde les plus tendres & les plus passionnées. La Sultane, qui la connoissoit, & qui ne luy cachoit rien, ne s'en mettoit pas en peine : Mais le Comte, qui ne prenoit point tant de plaisir à ces discours, quoyque fort touchans pour luy, qu'à ces entretiens muets, fit signe à cette Esclave, d'aller faire encore un petit tour : De quoy la Sultane, faisant semblant d'estre un peu fâchée, abbatit le rideau ; & l'arresta par derriere, d'une façon, que cét Amant ne le peut plus lever : Mais comme ce n'estoit que par feinte, & pour irriter davantage sa passion, cette rigueur ne dura pas ; & la paix se fit mieux que jamais.

Les

Les premieres faveurs donnent un certain privilege pour les autres, qu'il semble, qu'on a droit, non seulement de les esperer, mais de les demender. Le Comte pour se venger de la malice, que sa maistresse luy venoit de faire, passa ses deux bras au travers du Balustre, & l'embrassant tout d'un coup, il la baïsa d'une telle force, que le sang en sortit des leures de cette belle. Une pareille caresse, quoyqu'un peu violente, fut si charmante pour la Sultane, que bien loin de s'en plaindre, Elle amassa avec un tres grand soin ce sang avec son mouchoir, pour s'en faire honneur devant Laura, comme des marques tres sensibles de l'extreme passion, que son cher Alexandre avoit pour Elle.

Je diray en passant, non pas pour en donner envie, mais

I

comme

comme quelque chose de fort rare, que c'est une tres grande preuve d'amitié dans ce Pays-là envers une femme, que d'estre bien battuë par un homme qu'elle aime. J'avouë, que ces faveurs sont un peu rudes; mais dans ce Pays-là elles sont tournées de ce biais, & l'usage en est tel: Pour le sang, qui sortoit des leures de la passionnée Sultane, on peut bien dire, qu'il venoit d'un transport d'amour. On peut être mordu par un c. cez. de passion; mais non pas battu. Les coups passent la galanterie; & il faut estre Africaine asseurement, pour aimer d'estre caressée de cette maniere: La mode n'en passera jamais en Europe, quoyqu'on y en use quelque fois; mais je crois, que c'est a d'autres intentions, que celle d'obliger une femme; & les coups de baston n'y firent,

que



que je sçache, jamais plaisir a aucune.

Le reste du tems de cette visite s'estant passé en pur badinage, quoyque ce soit quelque fois, ce qui vaut le mieux, je ne m'arresteray pas à en dire davantage les particularitez. Laura, qui ne s'estoit pas fort escartée de ces deux Amans, revint à eux au moindre signe, qu'ils luy firent ; & apres un adieu des plus tendres, ils se separerent ; & l'Esclave ramena le Comte hors de l'appartement, si perdu d'amour, qu'à peine il y voyoit. Il fut de la chez le Bassa, qui, d'abord qu'il le vit, ne manqua pas de remarquer le changement, qu'il y avoit en luy, de ce qu'il estoit auparavant, avec un air tendre & languissant, qui le fit rire. He bien ! Alexandre, luy dit il, l'amour jouë-t-il bien son

personnage? sont ce les peines au moins, où les plaisirs, qui vous ont aujourd'huy si fort charmé. J'avoue, Seigneur, luy répondit il en soupirant, que ce sont les plaisirs, mais des plaisirs qui me cousteront peut être bien des peines. Le Bassa, qui crut, que la confiance vaudroit alors quelque chose, le prit par la main, & le mena avec luy au jardin, pour faire quelques tours d'allée. Il le mit d'abord sur le Chapitre de sa bonne fortune, & le pria de luy dire sincerement, où il en estoit. Le Comte, qui avoit encore l'esprit & le cœur tout remply d'amour, n'eut pas grand peine de luy faire un ravissant portrait de ses tendres sentimens, de luy peindre les plaisirs, qu'il avoit eus ce soir-là, avec des traits & des couleurs si vives & si touchantes, y adjou-

tant

tant les soupirs & les exclamations, avec des gestes & des regards si parlans & si passionnez, qu'il alla reveiller dans l'ame du Bassa la tendresse déjà assoupie, qu'il avoit vuë autrefois pour Laura. Quelque soin qu'on prene, de se guerir d'une passion, il en reste toujours assez dans le cœur d'un Amant, pour y exciter une grande ardeur, au moindre feu qu'on y approche. L'insensibilité & la resistance de Laura n'avoient pas eu assez de glace, pour esteindre entierement celui de ce Seigneur. Elle avoit seulement produit quelque cendre, qui n'avoit servy qu'à le mieux conserver pour une autrefois. Si le Comte en eust agy en Amant politique, il auroit prévu, qu'il estoit toujours fort delicat & fort dangereux, de faire de telles representations devant

des gens, qui sont de complexion amoureuse, à plus forte raison devant un homme, qu'il devoit regarder encore comm'un Espece de Rival, & qui avoit tout pouvoir sur luy. Mais il est vray, que, comme il ne croyoit pas hazarder rien du sien, en parlant ainsi de Laura, qu'il n'aimoit pas; & qu'au contraire, il fesoit mieux ses affaires, en luy persuadant qu'il l'aimoit, il ne se mesnagea pas, comm'il auroit fait dans une autre conjoncture.

Le Bassa n'en dort point de la nuit. Laura luy parut mille fois plus belle & plus charmante dans les traits que le Comte l'avoit représentée, qu'il ne l'avoit jamais veüe. Il se considéra comme le plus mal-heureux de tous les hommes, d'en avoir, non seulement abandonné la poursuite; mais d'avoir contribué luy même,

même, à la voir entre les bras d'un autre. La jalousie le prit sur cela, & apres la jalousie, le depit se mesla de le tourmenter. Il trouvoit, qu'il ne pouvoit rien estre arrivé de plus honteux à un homme comme luy, qui n'avoit jamais trouvé de la resistance en aucune femme, que d'avoir esté mesprisé par une Esclave, qui dependoit de luy, & qui s'estoit donnée à un autre Esclave, dès la premiere fois qu'elle l'avoit vû: car il ne doutoit pas, que tout ne fust déjà conclu, apres le recit passionné qu'Alexandre luy avoit fait. Il eut des imaginations sur ce Chapitre, qui luy donnerent de terribles chagrins; & s'il ne haïssoit pas le Comte, dans ce tems là, on peut assurer du moins, qu'il ne sentoit pas pour luy ce grand fonds de bonté, qu'il avoit d'ordinaire.

Pour

Pour Laura, quoyqu'il fust des-  
lors plus amoureux d'elle, qu'il  
ne l'avoit jamais esté, il ne lais-  
soit pas, d'avoir le cœur un peu  
aigry contre elle de certe prefe-  
rence, & de luy reprocher toute  
la nuit dans son esprit son peu  
de discernement, d'avoir fait plus  
de cas d'une amitié, qui ne luy  
pouvoit servir de rien, que de la  
siennne, qui auroit fait sa fortune:  
En suite de ces pensées, il luy en  
venoit d'autres, qui regardoient  
sa propre personne. Il s'accusoit  
de bassesse, de foiblesse de cœur,  
de s'inquieter pour les sentimens  
d'une creature, qui ne luy estoit si  
peu son estime: De vouloir trou-  
bler la satisfaction de deux A-  
mans, dont il avoit fait naistre  
luy même l'amour. Tout cela  
neanmoins n'empêcha pas, qu'il  
n'allast le lendemain au ferraill avec  
le Comte; mais c'estoit seule-  
ment,

ment, pour observer la contenance de Laura. Cette Esclave surprise de le voir venir, voicy qui est extraordinaire, Seigneur luy dit elle en riant, deux fois en une semaine: je ne sçay, ce qu'on n'en dira pas. Ce ne sera pas vous au moins, luy répondit le Bassa, qui y trouverez à redire, j'y viens trop bien accompagné: Et si l'on croit, adjouât-il, que cest pour l'amour de vous, comm'on à dit autrefois, vous sçavez, que ce n'est pas pour l'amour de moy; ainsi vous m'en devez estre d'autant plus obligée. Laura la remercia fort civilement de sa bonté. Ils lierent tous trois une petite conversation de galanterie, dans laquelle le Bassa dit assez de douceurs à Laura, pour luy faire comprendre une partie du trouble amoureux, qu'il y avoit dans  
son

son ame, si elle s'en fust deffinée :  
 mais de l'air qu'on s'y estoit pris,  
 toutes ces gentilleses passerent  
 pour des effets de sa belle hu-  
 meur. Cependant, comme le  
 Bassa ne pouvoit estre venu-là,  
 que sous le pre-texte de voir la  
 Sultane, il ne se peut dispenser  
 de luy rendre ce devoir ; mais il  
 n'y fut guere de tems ; & son  
 inquietude le rappelant auprez  
 de ces deux Amans, il les alla re-  
 joindre, le plustôt qu'il peut. Il  
 dit encore mille choses plus ob-  
 ligeantes à cette Esclave, que  
 tout ce qu'il luy avoit déjà dit.  
 Il luy fit même beaucoup d'a-  
 mitiez, & la regarda en sortant  
 d'une maniere, que si elle y eust  
 fait la moindre reflection, elle  
 eut bien compris, que la ten-  
 dresse qu'il avoit eu autrefois  
 pour elle, repreneoit feu plus que  
 jamais. Mais elle n'avoit garde  
 d'avoir



d'avoir ce soupçon , apres l'amitié qu'il avoit pour son cher Alexandre ; apres qu'il avoit esté l'instrument de cette pretendüe passion , qu'il y avoit entre elle & le Comte. Elle n'avoit garde de croire , qu'il la vculust troubler ; Elle prit tout pour galanterie , & n'en fit que railler avec la Sultane , a qui elle alla rendre compte , de tout ce qui s'estoit dit avec le Bassa & avec Alexandre. La belle Turque s'alla coucher fort peu contente ce soir-là de son destin , apres s'estre attendüe d'avoir encore un entretien pareil à celui qu'elle avoit eu le jour d'auparavant. Elle ne se pouvoit consoler du fâcheux contre tems de la visite d'un homme , qui faisant les delices de tous les autres , ne sembloit estre fait que pour l'incommoder & pour luy donner du chagrin à

Elle

Elle seule. Laura luy dit en plai-  
 fantant, qu'elle avoit grand tort  
 de s'en plaindre, puisque c'estoit  
 à sa complaisance, qu'elle devoit  
 son Amant. He mon Dieu ! qui  
 sçait ! luy répondit elle, pour  
 quoy il a esté si complaisant. Tu  
 peux croire au moins, adjouâ-  
 t-elle, que ce n'a pas esté, pour  
 m'obliger. Non assurément, Ma-  
 dame, luy repartit Laura, mais  
 vous ne luy estes pas moins ob-  
 ligée ; & ie crois que vous l'en  
 devez toujours remercier pour  
 moy. Apres cette petite rail-  
 lerie, Elles parlerent, de ce qui  
 pouvoit l'avoir amené ce soir-là,  
 & ne crurent pas, que ce fust  
 autre chose, que la complaisance  
 qu'il avoit pour le Comte.

Ce Seigneur estoit devenu cha-  
 grin, & solitaire. On ne le voyoit  
 plus que dans le jardin, ou il  
 se promenoit ordinairement tout  
 seul

seul & quelque fois avec Alexandre, à qui il ne parloit plus de Laura ni de retourner chez la Sultane : Ce qui donnoit quelque inquietude à cét Amant, qui, outre ce qu'il souffroit, d'estre privé de la veüe d'une personne, qu'il aimoit déjà plus que sa vie, & qu'il ne pouvoit plus cesser de voir, sans cesser de vivre, avoit mille cruelles idées sur le changement d'humeur du Bassa, qu'il ne pouvoit attribuer, qu'à quelque ombrage, qu'il luy avoit pris, peut être sur la Sultane. Mais s'il estoit tourmenté la dessus, cette belle & sa confidente n'en estoient pas moins en peine. Elles avoient vû passer le premier, le second, le troisieme, le quatrieme jour sans voir Alexandre. En amour on conte jusques aux momens & les jours d'absence paroissent bien longs.

K

Qu'est

Qu'est ce, que tout cecy, se disoient elles l'une à l'autre. Elles avoient mille frayeurs, & ne sçavoient de quoy. Il est bien difficile dans des li'ux comme ceux-là de rien faire de secret : Neanmoins elles ne croyoient pas, d'avoir jamais donné occasion de parler, ni que personne de l'appartement se fust apperceu de leur intrigue. Enfin le cinquieme jour, aprez bien de tourmens d'esprit, le Bassa les vint voir; mais le malheur fut, qu'il y vint seul. Il parut même si reveur & si changé, qu'elles ne douterent plus, qu'il n'eust eu le vent de cette intelligence, qu'elles avoient avec ce Chrestien : mais ce qui acheva de les perdre de frayeur, c'est que Laura l'ayant accompagné quelques pas hors de la Chambre, comm'elle avoit coutume de faire, luy demenda, ce qu'il

qu'il avoit fait de son cher Eunuque, je suis jaloux, luy répondit il sans s'arrester, & c'est assez vous dire. Ce fut la le coup mortel : Laura en alla donner l'allarme à sa maistresse, & luy dit, qu'il n'en falloit plus douter, & que le Bassa venoit de s'expliquer à elle, que c'estoit la jalousie, qui estoit la cause, qu'il n'amenoit plus Alexandre avec luy. On craint facilement, quand on est coupable; mais la peur à cela, qu'elle renverse tellement l'imagination des gens, qu'on prent pour des veritez tres-constantes les plus legers soupçons. Que de soupirs ? Que de larmes ? la pauvre Sultane ne-s'affligeoit pas tant des suites qu'elle pouvoit apprehender de la jalousie du Bassa, comme de la crainte, qu'elle avoit, que s'il estoit vray, qu'il fust jaloux de ce Chreslien,

qu'elle ne le vîst plus de sa vie. Elle auroit bien voulu, luy pouvoir écrire ; mais on n'a pas toujours en main des Postillons fidelles, dans des lieux où l'on a sujet de se deffier de tout le monde ; ou autant d'yeux, qui vous regardent, sont autant d'espions, à moins qu'on ne les mesnage, qu'on ne les gagne par argent où par caresse ; & encore aprez tous ces soins bien souvent on en est trompé. Comm'elle estoit dans cette peine, Laura receut un billêt du Comte, qu'un Eunuque luy apporta, & qu'elle alla d'abord montrer à la Sultane. Il contenoit ces paroles.

*Madame, le Bassa toujours plus obligeant veut bien que j'aye l'honneur de me promener ce soir avec vous dans le jardin du serrail. Je ne sçay, si vous pourrez vous dispenser*

*penſer juſques là. Nous prendrons l'heure, que vous jugerez la plus propre. Il y ſera avec une de ſes maiſtreſſes. Mandez-moy, ſ'il vous plait, ſi je puis eſſerer cette grace de vous.*

L'envie de cette promenade n'avoit pris au Baſſa, que par un extreme deſir qu'il avoit, de ſçavoir au vray, ou en eſtoient Laura & Alexandre, & ce qui ſe paſſoit dans leur converſation. Le jardin eſtoit un lieu propre pour ce deſſein, & ſur tout la nuit, qu'il pouvoit les eſcouter ſans eſtre veu. Il en avoit fait la propoſition au Comte, dans la croyance qu'il la recevroit fort agreablement; & en effet il en teſmoigna aſſez de joye, quoy-qu'il n'eſperait pas, que cette partie deuſt jamais reuſſir; parcequ'il y avoit peu d'apparence que la Sultane permiſt à Laura

d'y venir : mais ce qui l'affligea, c'est qu'il crut, qu'effectivement le Bassa estoit jaloux de sa femme, puis qu'il ne vouloit plus, que ce fust chez Elle, qu'il vist Laura.

Il fut question d'écrire à cette Esclave pour la disposer a estre de la promenade. Le Comte écrivit le billet, & le Bassa l'ayant envoyé par un Eunuque, voulut attendre son retour, pour voir la réponse que Laura y feroit.

La Sultane lut ce billet, & eut la même pensée que son Amant, que c'estoit pour l'amour d'elle, que le Bassa ne vouloit pas, qu'il vint davantage dans son appartement, pour voir Laura. Elle fut long tems à prendre une résolution sur cette promenade. Laura fort avisée ne jugeoit pas à propos d'y aller, mais elle qui ne  
suiroit



suivoit que les mouvemens de sa passion, & qui aimoit trop pour rien faire avec raison, sur ce qui regardoit les affaires du cœur, voulut, quoyqu'elle peust dire, qu'elle luy fist cette réponse.

*Vous joueriez un trop mechant personnage, d'estre tout seul dans un jardin, pendant que d'autres s'y divertiroient. Je consens par pitié, de vous y aller tenir compagnie; à condition néanmoins, que vous serez sage, & que nous serons un peu esloignez du lieu, où le Bassa sera; parceque je ne veux pas estre connue, de celle qu'il aura avec luy. Si vous me pouvez promettre ces deux choses, je suis à vous, apres la quatrième priere, que la Sultane sera couchée. Adieu.*

Cette réponse passa l'attente du Comte, & le rejoûit extrêmement, dans le plaisir qu'il se promettoit,

mettoit d'avoir avec cette Esclave, de s'entretenir de la Sultane, tout le tems qu'ils feroient dans le jardin.

La nuit estant venue & l'heure de la quatrième priere passée, le Bassa luy dit, qu'il pouvoit aller prendre Laura, & la conduire au jardin, pendant, que de son costé, il iroit chercher celle de ses maistresses, qui estoit de quartier. Car voyla comme ces Seigneurs en usent, avec la quantité de femmes qu'ils ont, dans leurs ferrails : Quand ils n'ont point d'entestement particulier pour aucune, aujourd'huy ce sera celle-cy, & demain un autre; & ne trouvant plus de ragoust à l'amour, ils en cherchent au changement, & à la varieté des mets.

Je crois, qu'il n'y aura pas beaucoup de peine à s'imaginer,  
avec

avec quelle extreme joye Alexandre receut cette commission, & l'empressement qu'il eut, d'arriver chez la Sultane, qui toute charmée de le voir, ne peut luy tesmoigner la joye qu'elle en avoit, que par mille transports d'amour, & les caresses les plus tendres, qu'une amante passionnée pouvoit faire a l'amant le plus aimé. Alexandre fit fort bien son devoir, & ne rendit pas seulement transport pour transport, caresse pour care<sup>ce</sup>, mais il passa, & l'amour fit des choses en luy, où luy en fit faire dont l'amoureuse Sultane fut tres contente. On s'estonnera peut être, qu'en si peu de jours, deux personnes, qui s'estoient si peu veuës, fussent si bons amys; mais on scaura, que l'amour fait bien plus de chemin dans ces Pays chauds, que dans les Pays froids,

froids, cù il n'y a que vents,  
que neiges, que pluyes a effuyer,  
& qui luy gâtent les aisles &  
l'empêchent de voler. Icy le  
soleil est presque toujours dans  
son midy; & l'amour qui est un  
enfant tendre & cui va tout  
nud fait bien mieux ses affaires.  
Il y trouve les cœurs tous dis-  
posez, & avec rien il y met  
le feu.

Le Comte, qui ne pouvoit pas  
trop s'arrester, voulut mesnager  
le peu de tems qu'il luy restoit,  
à demeurer avec la Sultane, à luy  
faire quelques petits reproches,  
sur ce qu'elle souffroit, que Laura  
vint faire cette promenade avec  
luy. Il faut, luy dit il, Madame,  
où que vous ayez bonne opinion  
de mon cœur, où que vous m'ai-  
miez bien tranquillement, pour  
n'avoir pas la moindre inquie-  
tude la dessus. La belle Sultane  
luy

luy répondit, qu'elle ne se repo-  
 soit pas tant sur sa fidélité, que  
 sur la sagesse de Laura, qu'elle  
 connoissoit trop bien, pour  
 croire, qu'elle luy voulust faire  
 une perfidie. Prenez garde à  
 vous seulement, continua-t-elle;  
 car pour elle je m'y fie; & si  
 vous voulez faire vôtre devoir,  
 je suis persuadée, qu'elle ne man-  
 quera pas au sien. Apres ces pa-  
 roles, elle ne voulut pas l'ar-  
 rester davantage, de peur du Bassa  
 & elle se retira dans sa Chambre.  
 Cét heureux Amant, content de  
 l'agréable moment, qu'il venoit  
 de passer, demanda à Laura, si  
 elle estoit presté: Elle luy ré-  
 pondit, qu'il ne luy manquoit  
 plus, que son *Barkus*, qu'elle alla  
 prendre. C'est une Espèce de  
 chappe qui les couvre depuis la  
 teste jusqu'aux pieds. Le Comte  
 la voyant revenir, cachée sous cét  
 har-

harnois, prit le devant, selon la coustume du Pays, & elle le suivit aprez. Il ne luy dit rien, tant qu'ils furent dans le ferrail, de peur que quelqu'un ne les entendist, & ne les reconnust; mais estant arrivez dans le jardin, où la liberté estoit grande, il commença de rompre le silence. Qui ne diroit, Madame, luy dit il, que nous avons des desseins amoureux; car voicy un rendez-vous dans les formes; & le Bassa ne manquera pas, de nous croire les plus heureux Amans du monde. Cette belle ne luy répondit rien: Elle fesoit toujours son chemin & ils entrèrent enfin dans le cabinet, qui leur avoit este assigné, & qui estoit assez esloigné de celui du Bassa, comme Laura l'avoit désiré. Le Comte luy donna la main, & comm'il sçavoit fort bien les erres  
de

de tous ces lieux la qu'il visitoit presque tous les jours, il la fit asseoir sur des sieges de gazon, qu'il y avoit. C'est bien en verité, Madame, luy dit il, en continuant sur la même pointe, mettre la fidellité d'un homme a l'epreuve, que de l'exposer a passer une partie de la nuit dans un lieu comme celuy-cy avec une fille aussi belle que vous. Aprez cela, je crois, que la Sultane doit estre persuadée de ma passion. Le Comte n'en dit pas davantage, pour voir ce qu'elle luy répondroit; mais comm'elle ne luy disoit mot encore, je pensois, poursuivit il, qu'on nous avoit deffendu tous les plaisirs d'un rendez-vous, hors-mis celuy de nous entretenir; mais à ce que je vois, vous voulez vivre a la Turquie; & parceque c'est une grande faveur en ce Pays, que

L

fait

fait une femme, que de se faire voir, où de parler à un homme, vous me voulez priver de l'un & de l'autre. Mais, je vous prie, vivons, quand nous serons ensemble, a la façon de nostre Pays, qui est bien plus raisonnable, que celle des Tuics : La rigueur seroit trop grande, si vous en usiez autrement avec moy ; & je crois, que ce seroit plus, que la Sultane ne vous en demende ; & même plus que vous ne luy avez promis. Quittez de grace, adjouta-t-il, en la prennant par son Barnus, cette inutile chappe ; car Elle n'est plus necessaire icy : & ayez la bonté de me dire quelque chose sur la Sultane, où si vous voulez, sur les aventures, qui vous ont amenée icy, & que depuis le premier jour, que j'ay eu l'honneur de vous voir, j'ay eu une extreme envie de vous de-



demander. Vous ne me refuserez pas cette grace, si vous jugez que je vous puisse estre necessaire à quelque chose, comme je n'en doute pas, estant d'un même Pays que vous, & assez aimé du Bassa, pour vous pouvoir servir auprès de luy. Elle escouta tout ce discours, qui devoit estre fort obligeant pour Laura, sans luy repartir, & sans quitter son Baranus, comm'il l'en prioit. Ce que voyant le Comte, il ne l'en pressa pas davantage, & prenant un air plus serieux, si vous souhaitez, Madame, luy dit il, que nous passions ainsi la soirée, ce sera tres-cruellement pour moy ; mais il faudra s'y accommoder, & s'esloignant d'elle de quelques pas, il s'alla asseoir dans un coüin de ce cabinet, où il fut quelque tems, sans luy rien dire aussi. Cette belle soupiroit, comme si

elle eust esté fâchée, qu'il l'eust quittée; mais le Comte fesoit le cruel à son tour, & ne répondoit point à ses soupirs. A la fin Elle s'approcha de luy, le prit par le bras, l'embrassa, avec plusieurs autres grimaces, comme si elle l'eust voulu mettre tout de nouveau en jeu. Le Comte se prenant à rire; Pour Dieu, Madame, luy dit il, contentez-vous du sacrifice, que je fais à l'amour, sans vouloir pousser ma patience à bout. Ayons, si vous voulez, un peu de conversation; mais répondez moy, car je n'aime point de parler seul. Point de nouvelle: elle rioit seulement sous cette chappe, & prenoit plaisir à luy faire mille malices: dont à la fin le Comte s'impatientant, c'est trop, luy dit il, & puis que vous voulez rire, je m'en vay jouer à un jeu, qui  
vous

vous fera parler, malgré que vous en ayez. La dessus il la prit entre ses bras, & ne luy pouvant ôster cette chappe, il prit certaines privautez auprez d'elle à faire rompre le silence à une fille aussi sage que Laura : Neanmoins Elle tint bon, & ne se deffendoit presque pas ; de quoy le Comte fut extremement surpris ; & apres l'estime, qu'il avoit conceüe pour cette fille, il crut, où qu'il y avoit quelque mechanceté cachée la dessous, où qu'il s'abusoit ; & ce fut alors, qu'il fit plus deffort que jamais, pour la voir au travers d'un peu de clarté, qu'il entroit dans ce cabinet. Si la Sultane, luy dit il, sçavoit, ce que vous me permettez, elle ne vous sçauroit guere de gré de vôtre silence, ni de la difficulté, que vous faites de vous laisser voir. Il semble que ce n'est, que

pour me donner lieu, de tout entreprendre ; & que vous ne me refusez les bagatelles, que pour m'accorder le Principal. Cette belle ne pouvant plus se deffendre, luy abandonna son Barnus, & s'eschappant de ses mains, ah petit traistre, luy dit elle, est ce là la fidelité, que tu m'as promise. Ah ciel ! Madame est ce vous ? c'estoit la Sultane même, qui avoit pris la place de Laura, & l'on peut penser, quelle agreable surprise fut celle de cét Amant. Dabord il ne la peut exprimer, que par cette exclamation ; & courant aprez Elle, qui ne fuyoit pas trop vitte, il l'atteignit à la porte du cabinet & l'embrassant de toute sa tendresse, ma chere Sultane, s'ecriait-il, pour la deuzieme fois, est ce vous. Ouy c'est moy même, luy répondit elle, en se laissant douce-

doucement ramener dans le cabinet, mais qui me repents déjà, de ce que j'ay fait pour vous ; car vous ne le meritez pas. Me croyiez vous si simple, poursuivit elle, que d'exposer ainsi entre les mains d'un' autre, ce que j'ay de plus cher au monde : Ne vois-je pas, qu'il m'en auroit pris mal de m'y fier. Vòtre constance estoit fort chancelante ; elle estoit du moins à demy-vaincuë ; & si Laura la fausse Laura eust répondu à vos avances, ou en seriez-vous. Jamais homme plus confus que le Comte de tous ces reproches. Il n'estoit ni tout à fait coupable, ni tout à fait innocent. Il l'avoüa bien ; mais il s'excusa sur la conduite, qu'elle avoit tenuë avec luy ; & qu'il n'estoit pas d'un homme, de résister à toutes les attaques, qu'elle luy avoit fait. Enfin il gaigna  
sa

sa cause; l'accommodement se fit, dont l'amour signa les articles.

C'estoit bien s'exposer, que de faire un tour comme la Sultane, que de venir chercher un Galand dans un jardin, où elle sçavoit que son mary estoit: Bien de femmes ne la trouveront pas sage, & desapprouveront sa conduite; mais de celles qui aiment, je crois, qu'il en est peu, qui estant en sa place n'eussent pris le même party. Le Bassa, quoyqu'accompagné d'une fort belle Personne, passoit un peu plus mal son tems, que le Comte. Chabania, c'est ainsi qu'elle s'appelloit, outre la beauté, avoit l'esprit d'un fort joly tour & des manieres fort engageantes, qui la fesoient passer pour la plus charmante femme du ferrail. Le Bassa l'avoit autrefois fort aimée; mais toutes ces  
amours

amours commodes ne sont pas de durée. Elle eut beau faire ce soir-là, le Patron n'estoit point d'humeur à s'entretenir avec elle, & ne l'avoit menée avec luy, que pour luy servir de pretexte. Elle s'en deffia, d'abord qu'elle sceut, que Laura estoit dans le jardin. Le Balla luy avoit fait cette mechante confidence, croyant que c'estoit assez, pour luy mettre l'esprit en repos de ce costé-là, que de luy dire, que cette Esclave estoit fort amoureuse d'Alexandre, avec qui elle estoit. Elle n'en crut rien; & s'imagina bien plustôt, que ce Chrestien luy servoit de confident; & qu'il ne l'avoit amenée dans le jardin, que pour son maistre. Elle en avoit esté jalouse, autrefois jusqu'à perdre l'esprit; & je ne sçay pour quoy, ce Seigneur s'estoit si mal adressé, & qu'il n'avoit pas pris  
une

une femme plus commode. Elle estoit au desespoir de la pauvre figure, qu'il luy fesoit faire : à peine il luy avoit dit quatre paroles ; & elle voyoit bien, qu'il songeoit a Laura, pendant qu'il estoit avec elle ; cruelles conjectures pour une femme qui aime, qui sçait, qu'elle est belle, & qui a de la fierté ; mais ce qui acheva de la desesperer, c'est que le Bassa, à qui la jalousie ne donnoit point de treve, apres avoir esté quelque tems avec Eile, sans luy faire la moindre amitié, quoyqu'elle luy en donnât plus d'une fois occasion, luy dit, qu'il avoit envie, d'aller escouter les Chrestiens, pour sçavoir, de quoy ils s'entrenoient. Elle ne luy répondit rien ; & le laissa partir ; mais un moment apres, elle fut par une autre route a ce même cabinet, pour l'observer un peu luy



luy même, & voir ce qu'il feroit.

Les nuits sont fort claires dans ce Pays-là, & sur tout en Esté. Le Bassa, avec toutes les precautions qu'il avoit prises, de s'approcher de l'endroit, où estoit Alexandre, à la faveur des hayes, dont il se couvroit, le mieux qu'il pouvoit, fut apperceu de la fausse Laura. Son ombre le fit descouvrir; & cette belle en ayant fait prendre garde à son Amant, il sortit & courut au devant du Bassa, pour le prier de ne passer pas plus avant; & d'avoir l'honneste complaisance de luy laisser jouir des agreables momens, qu'il luy avoit bien voulu procurer. La Sultane qui ne sçavoit, ce qui amenoit le Bassa de leur costé, dans la frayeur qu'elle avoit, qu'il n'entrât dans le calinet, malgré tout

ce

ce que luy pourroit dire Alexandre, en sortit d'abord apres luy, pour s'aller cacher dans quelque coüin du jardin, où elle se croyoit bien plus en seureté.

Cependant le jaloux Bassa, confus d'avoir esté descouvert, se laissa flechir aux prieres de son Rival, n'y ayant plus lieu d'exécuter le dessein qu'il avoit entrepris, & qui luy avoit si mal reussy : si bien qu'il reprit le chemin de son cabinet, & Alexandre celuy du sien ; où estant arrivé, il fut bien estonné, de n'y trouver plus la Sultane. Il jugea bien, que la peur luy avoit fait prendre la fuite. Il en estoit déjà en peine, & vouloit l'aller chercher ; mais comm'il estoit prest de sortir, il vit, dans l'endroit le plus retiré de ce cabinet, quelque chose, qui avoit la figure  
d'une

d'une femme. Il s'en approcha, & trouvant qu'il ne s'estoit pas mespris, il crut, que c'estoit un petit tour de malice, que la Sultane luy avoit voulu faire. Il en eut une joye extreme, & l'embrassant d'un air le plus passionné du monde, vous estes bien méchante, luy dit il, Madame, vous me vouliez faire courir tout le jardin pour vous chercher. Cette belle ne luy répondit rien, & se démeslant d'entre ses bras, Elle le quitta brusquement & se retira dans un autre coüin du cabinet : Ce procedé n'estoit pas d'un esprit aussi doux que celuy de la Sultane, qui l'aimoit si tendrement. Le Cavallier en fut surpris ; mais le moyen de se detromper si tôt la dessus, & de pouvoir croire qu'en si peu de tems, il se fust fait un si grand changement. Il s'approcha d'elle

M

pou

pour la seconde fois , & la prenant par la main , pourquoy me fuyez-vous, luy dit il, Madame, & pourquoy vous cacher ? Il n'y a plus rien à craindre , le Bassa s'est retiré dans son quartier, & m'a promis , de ne nous plus troubler. Il n'en peut tirer encore de réponse, & ne sçachant que croire de cette rigueur, il mit un genoux à terre, où elle s'estoit assise sur du gazon, & luy baisant la main qu'il luy tenoit, il la pria pour Dieu, de luy dire, ce qu'elle avoit, qu'il sembloit, qu'elle fust fâchée contre luy. Il la caressa, il luy fit des amities & des tendresses , qu'elle souffrit assez doucement : mais a la fin l'ayant entendu rire, d'un ris bien différent de celui de la belle Sultane, il l'examina de plus prez ; & reconnut à la Taille, que celle-cy qu'il avoit un peu plus grossiere, & à ses

ses habits, qui n'estoient pas de même, qu'il se melprennoit. Quel embarras fut le sien ? juste ciel ! Il crut d'estre arrivé au pays des methamorphoses, & qu'il estoit, pour voir ce jour-là les choses les plus extraordinaires du monde. Que Laura se fust changée en la Sultane, cela n'estoit pas si surprenant ; le changement du moins en estoit agreable : mais que la Sultane fust devenuë une autre femme, & peut être la maistresse du Bassa, c'est ce qu'il ne pouvoit comprendre. Mais ce qui le troubloit le plus ; & qui luy donnoit de furieuses inquietudes, c'est la peine, où il estoit, de ne sçavoir, ce que la Sultane estoit devenuë ; & la crainte qu'il avoit, que le Bassa ne la rencontrât dans le jardin ; & qu'il ne la reconnût. Il voulut aller a son secours ; mais Chabania, car c'estoit

elle, qu'il avoit pris pour la Sul-  
 tane, l'arresta par son caffetan,  
 & luy dit en moresq, qu'en ne  
 quittoit pas ainsi les Dames, à  
 qui on avoit déjà fait quelqu'a-  
 vance d'amitié. Le Comte, qui  
 n'entendoit pas cette langue, la  
 pria de souffrir, qu'il se retiât,  
 depeur que le Bassa ne vint, &  
 qu'il ne se fâchât contre luy, s'il  
 le trouvoit avec Elle. Mais ce  
 furent des prieres inutiles : Elle  
 n'entendoit point l'Italien, non  
 plus que luy le moresq ; & bien  
 loin de le laisser aller, elle vou-  
 loit, qu'il s'assist auprez d'Elle,  
 pour la venger des mespris du  
 Bassa. Pendant cette petite con-  
 testation, qui devoit avoir quel-  
 que chose de fort singulier, entre  
 deux personnes, qui ne s'en en-  
 doient pas, la Sultane entra toute  
 hors d'haleine, & se jetta pres-  
 que demy morte entre les bras  
 d'Alex-

d'Alexandre, qui se trouva justement de ce costé-là pour la recevoir. Quelle frayeur pour cet amant ? Et quelles pensées n'eut il pas d'abord ? Il crut, que tout estoit perdu, & qu'elle avoit esté reconnüe. Mais le Bassa arrivant un moment apres Elle, le rassura par ces paroles. Vous fuyez, Madame, dit il à la fausse Laura, d'une estrange vitéssé, un homme qui ne vous veut point de mal, & qui n'avoit pas envie de vous en faire : Et se tournant ensuite du costé d'Alexandre, il luy alloit faire sans doute quelque excuse galante, de luy avoir manqué de parole ; mais voyant Chabania auprez de luy, il changea tout d'un coup de pensée & de langage ; & demanda en moresq à cette belle, ce qu'elle estoit venu faire dans ce cabinet. Elle se leva, & apres avoir répondu

d'un ton fort haut à cette question, Elle luy fit mille reproches sur son indigne foiblesse, de la quitter, pour suivre une misérable Esclave, qui le fuyoit. Ce fut une scene fort rare, que celle-là, & un Dialogue fort plaissant pour la Sultane ; mais il n'y eut pas long tems à rire pour Elle ; car Chabania, outrée jusques dans l'ame, du mespris, que le Bassa fesoit d'elle, & de ce qu'il luy disoit devant sa pretenduë Rivale, se lança, comm'une furie sur elle, avec tant de promptitude, que le Bassa, ni Alexandre, qui la voulurent arrester, ne pûrent sauver la fausse Laura, d'estre un peu maltraitée. Cét Amant sentit jusqu'au fond du cœur cét outrage, & toutes les considerations, ni de la vie, ni de ce qu'il devoit au Bassa ne l'auroient pas empêché, d'en tirer raison,



raison, si la crainte, qu'il eut, de perdre la Sultane, n'eust pas esté plus forte, que son ressentiment. Le Bassa n'en fut pas moins fâché que luy ; & prenant par la main cette emportée il la tira d'une maniere assez rude hors de ce cabinet, & la mena avec luy.

Le Comte ne se vit pas plustôt seul avec la Sultane, que l'embrassant tendrement, mon Dieu ! Madame, luy dit il, d'une voix passionnée ; Que de dangers vous venez de passer pour l'amour de moy ? Et quelle cruelle insulte vous venez de souffrir ? La Sultane ne fesoit, que rire de la dernière accanture, qui luy estoit arrivée, & disoit qu'elle avoit eu plus de plaisir, de voir le desespoir de Chabania, pour qui naturellement elle avoit toujours eu beaucoup d'aversion, qu'elle n'en

n'en avoit reçu de mal. Mais Elle avouoit en même tems, que la rencontre du Bassa, qui alloit cherchant cette femme dans le jardin, luy avoit fait une cruelle peine ; & que c'estoit par le plus grand bonheur du monde, qu'elle avoit porté avec Elle son Barnus, pour se cacher. Elle adjoûtoit à cela que ce cher époux luy avoit dit mille galanteries, qu'il luy en avoit fait même d'un peu fortes ; mais que sa fortune avoit voulu, qu'elle ne fust pas alors fort loin du cabinet, & qu'elle se fust eschappée de ses mains, dont peut être elle ne se scroit pas tirée heureusement, & sans quelque facheuse suite. Elle luy dit, qu'aprez cela il ne falloit pas douter, que le Bassa ne fust devenu tout de nouveau amoureux de Laura, que toutes ces douceurs qu'il luy avoit dit, & tous  
les

les emportemens qu'il avoit eus dans cette rencontre, ne le luy avoient fait que trop connoître. Que c'estoit là le véritable sujet de leurs allarmes, & la raison pourquoy il ne le menoit plus au ferrail. Le Comte fut de son sentiment, & ils jugerent l'un & l'autre, qu'ils avoient besoin de le ménager; mais qu'il falloit, que Laura, qui devoit jouer le principal rôle, les servit de son adresse & de sa complaisance.

Le Bassa, qui prennoit peu de plaisir dans ce jardin, apres le mechant succez de tous ses desseins amoureux, ayant taché d'appaïser un peu l'esprit irrité de Chabania, voulut la ramener chez elle, & passa devant le cabinet d'Alexandre, pour luy faire signe, qu'il estoit tems de se retirer. Le Chrestien le suivit un moment apres

aprez trop heureux d'estre sorty de cette maniere d'une promenade si pleine d'avantures. Il accompagna sa chere Sultane dans son appartement, où il ne s'arresta par fort long tems avec elle, depeur du Bassa, & se retira chez luy. Il passa fort agreablement le reste de la nuit, quoyqu'il ne dormist guere ; & je crois qu'il en avoit raison ; mais non pas son Patron, qui n'eut, que de mortels chagrins pour luy. Laura, dont il estoit alors plus amoureux, qu'il n'avoit esté de sa vie, le desesperoit par ses rigueurs & ses cruautéz. Plus de douceur dans sa vie, si elle n'avoit un peu de pitié de luy. Toute l'affection, qu'il avoit pour Alexandre, ne pouvoit l'empêcher, d'estre son Rival, & de souhaitter, de partager avec luy les faveurs, qu'il recevoit de cette belle. Sa passion estoit en  
un

un point, que c'est le dernier de tous les martyres, que de n'estre pas aimé : & quand il songeoit à l'occasion, qu'il avoit laissé perdre la nuit precedente, lors qu'il tenoit Laura en son pouvoir, il en avoit un si cruel depit, qu'il s'en feroit volontiers pris contre luy même. Il n'avoit pourtant pas trop à se repentir de sa discretion ; car il en avoit assez fait, & à moins que d'avoir voulu pousser la galanterie à bout, il n'en pouvoit pas faire davantage. Il ne vouloit pas se declarer encore à Alexandre, ni luy faire connoistre ses nouveaux sentimens ; soit pour luy espargner le desplaisir, qu'il jugeoit bien, qu'il luy donneroit, soit parce qu'il se vouloit servir de luy, & qu'il luy pouvoit nuire.

Le matin, d'abord qu'il fut levé, il alla chez luy, comm'il se-  
loités

soit quelque fois familièrement &  
 sans suite, & le trouva encore au  
 liét. Il faut, luy dit il, estre aussi  
 heureux, qu'Alexandre l'est en  
 amour, pour pouvoir dormir,  
 aussi tranquillement que luy. S'il  
 y a quelqu'un, Seigneur, luy ré-  
 pondit le Comte, qui ait sujet de  
 se louer de sa bonne fortune sur  
 ce chapitre, c'est sans doute un  
 Seigneur aussi bien fait & aussi  
 galant que vous, qui n'a, qu'à  
 dire j'aime, pour estre aimé.  
 Ouy ? jusqu'à Laura, luy repar-  
 tit en souriant le Bassa, mais cette  
 Esclave ma bien fait connoistre,  
 que je pouvois soupirer inutile-  
 ment ; & que pour estre maistre  
 de la Personne, on ne l'estoit pas  
 du cœur. Il a fallu, continua-  
 t-il, qu'Alexandre soit venu de  
 l'Europe en Afrique, pour faire  
 cette conquête. C'est en cela,  
 Seigneur, luy repliqua le Comte,  
 que

que paroît la Bizarrerie de l'a-  
 mour, qui ne sçait bien souvent,  
 à quoy il s'attache ; mais qui suit  
 les effets du destin ou des Astres,  
 qui predominant sur les cœurs.  
 Je crois, Seigneur, adjôûta-t-il  
 en souriant aussi, que vous estes  
 déjà tout consolé de celuy de  
 Laura, & que vous navez pas de-  
 siré, que j'en fusse amoureux,  
 pour devenir mon Rival. Je vous  
 declare au moins, poursuivit il,  
 voyant que le Roy soupiroit, que  
 quand cela arrivera, vous ne sçau-  
 riez me faire plus de grace, que  
 de m'en advertir : Parceque toute  
 la passion que je puis avoir pour  
 cette fille, ne m'empêchera pas  
 de faire mon devoir. Je cesseray  
 d'y rien pretendre, d'abord que  
 je sçauray, que vous y avez le  
 moindre dessein, pour n'avoir  
 rien à disputer avec une Per-  
 sonne, a qui, comme je dois

N

routes,

toutes choses, je cederay aussi  
 tout. On ne se deffait pas si  
 aysement, luy répondit le Ba'a,  
 d'une passion comme la vôtre.  
 Croyez moy Alexandre: il faudroit  
 premierement, me persuader,  
 que vous ne sçavez guere  
 aimer. J'aime assurement, Seigneur,  
 luy repartit le Comte,  
 & peut-être autant qu'on peut  
 aimer; mais apres les bontez  
 dont vous me comblez tous les  
 jours, ce sera toujours vôtre  
 repos & vôtre satisfaction, que  
 j'aimeray le plus; & si Laura  
 vous paroît aimable, comme elle  
 l'a esté autrefois a vos yeux, je  
 vous le dis encore une fois,  
 Seigneur, je cesse de l'aimer.  
 Le rusé Italien ne se mettoit pas  
 en grand frais; il pouvoit bien  
 faire le genereux, quand il n'y  
 alloit rien du sien. Le Bassa luy  
 demenda, s'il en auroit bien  
 voulu



voulu dire autant devant cette belle : & il luy répondit, qu'il le croyoit trop juste & trop galant, pour vouloir exiger de luy, qu'il fîst devant une maîtresse une déclaration comme celle là. Ensuite de ce discours, le Bassa luy proposa de faire une seconde partie de promenade, pour ce jour là ; & le pria en même tems d'en écrire à Laura. Le Comte ne s'en estant pû deffendre, voicy la réponse qu'il en receut.

*On ne s'expose pas deux fois au même danger : Le Bassa ne m'a pas assez mesnagée la nuit passée, pour m'y oser fier encore ; & vous vîtez de plus comme j'y fus maltraittée par celle, qu'il avoit avec luy. Contentez-vous que si vous venez icy, j'auray l'honneur de vous voir mais plus de promenade.*

Le Bassa bien chagrin de cette réponse, à laquelle il ne s'atten-

doit pas, sortit de la Chambre du Comte, sans luy rien dire ; & passa le reste du jour, sans voir personne. Neanmoins, le soir, il fut chez la Sultane, où il rencontra d'abord Laura, qui luy demanda encore des nouvelles d'Alexandre, & pourquoy il ne l'amenoit plus avec luy. Serez vous fâchée, luy répondit il, que je rienne sa place pour ce soir. Ce seroit trop d'honneur pour moy, luy repartit elle en riant ; mais la Sultane vous attend, qui ne se porte pas bien. Le Bassa luy donna la main, & la voulut mener dans une Chambre particuliere : ce que voyant cette Esclave, & que c'estoit tout de bon, le pria de la laisser aller, que sa maîtresse se trouvoit mal, & qu'il sçavoit bien, qu'elle ne pouvoit estre un moment sans la voir. Ouy la Sultane est malade, luy repartit le

le Bassa, Elle ne peut estre un moment sans vous voir, parceque c'est moy, qui desire de passer ce moment avec vous : si c'estoit Alexandre, vous trouveriez bien le moyen de n'avoir pas si tôt à faire auprez d'elle. Il luy fit ce reproche d'un si plaisant ton de voix, qu'elle ne peut s'empêcher d'en rire. Vous sçavez, luy repliqua-t-elle, que ce n'est pas la même chose, quand vous estes auprez d'elle : Et puis, adjousta-t-elle en souriant, on se hazarde un peu plus pour un amant. He bien ? c'est l'amour aussi, luy dit il, en la pressant de le suivre, qui m'ameine icy. Et c'est aussi Seigneur, luy répondit Elle, en tâchant de se deffaire de luy, ce qui m'oblige à eviter l'occasion de me trouver seule avec vous : car quoyque vous soyiez un homme achevé en toutes choses,

vous me permettez bien, de vous dire, que pour le sexe, vous n'avez guere d'egard, & qu'on ne se peut guere fier à vous ; tescmoin les insultes que vous me fîtes hier au soir au jardin. Le Bassa luy fit mille sermens de se tenir dans tout le respect & toute la discretion, qu'elle pouvoit desirer d'un honneste homme luy protestant, qu'il ne demendoit, qu'un quart d'heure d'entretien avec elle : sibien que Laura, qui connoissoit son humeur emportée, quand on<sup>\*</sup> luy refusoit ce qu'il croyoit de raisonnable, se laissa aller, à luy accorder ce quart d'heure d'entretien. Il luy fit mille reproches sur la dureté, qu'elle avoit toujors eüe, pour luy, & luy dit les choses du monde les plus tendres & les plus passionnées. Laura se defendit toujors sur l'honneur, sur  
sa

sa Religion, sur la Sultane sa maistresse, qui estoient trois choses, qu'elle n'auroit pas voulu trahir pour la vie. Si vous m'aimiez un peu, luy répondit le Roy en soupirant, vous ne trouveriez pas tant de raisons pour vous deffendre. J'ay ma Religion, poursuivit il, comme vous la vôtre, & qui a des loys pour le moins aussi severes; mais l'amour est plus fort que toutes les loix & que toutes les Religions du monde; & ceux qui le servent, n'adorent point d'autre Dieu. Pour la Sultane, que vous importe-t-il, ce sera mon affaire & non pas la vôtre; & il ne tiendra qu'a vous, qu'elle n'en sache rien. Mais que me dites-vous de l'honneur? En verité, y va-t-il plus de vôtre gloire, d'aimer un homme comme moy, que d'aimer un homme comm'Alexandre.

Vous

Vous vous trompez, Seigneur, luy répondit Laura, si vous croyez, que dans les visites que m'a rendu ce Chrestien, il s'y soit rien passé de contraire à mon devoir. Il n'est pas des gens de nostre Nation, comme ceux de celle-cy: Pour estre ensemble & sans tesmoin, une fille n'en est pas moins en seureté de son honneur. Je vous jure, Seigneur, qu'Alexandre n'a jamais receu faveur de moy, que je ne pûsse accorder a l'homme du monde, qui me seroit le plus indifferant. Quoy dans le jardin? interrompit le Bassa. Ni dans le jardin, ni ailleurs, luy repartit eile, il n'a point eu d'autre avantage, que celuy de m'avoir veüe, qui, parmy nous, est compté pour rien. Pourriez-vous, luy repliqua le Bassa, me faire accroire, ce que vous dites. Laura luy dit, qu'il  
n'y

n'y avoit rien de si vray, & qu'il en pouvoit estre persuadé. Mais Seigneur, adjouâta-t-elle, faites mieux, ne l'amenez plus icy; & vous verrez, si je vous en fais jamais de plainte. J'aurois tort, luy repartit le Bassa, de vouloir destruire une si belle amitié. Je vous proteste, que si je pouvois, je ne vous y troublerois point; mais je ne suis pas si bien maistre de moy même, que je puis le gagner cela sur mon cœur, ni le ranger, comme je voudrois. Neanmoins, puisque vous aimez si peu Alexandre, que vous puissiez vous resoudre si facilement à ne le plus voir, je ne dois pas tant me gesner; mais esperer plustôt, que, quelque jour, vous m'aimerez peut-être autant que luy.

Après ces paroles, le Bassa se retira, l'esprit un peu plus en repos.

repos, que quand il estoit venu, quoyque toujours fort amoureux. Il n'adjouôtoit pas entièrement foy, à ce que Laura luy avoit dit, sur le peu d'attachement, qu'elle avoit, pour Alexandre ; mais il croyoit bien, qu'elle n'avoit pas cette grande passion pour ce Chrestien, qu'il s'estoit imaginé, où bien, qu'il estoit arrivé quelque querelle entre ces deux Amans, qui avoit un peu refroidy leur amour : car de part & d'autre, il avoit remarqué, plus d'indifference, que cette passion n'a coustume d'en inspirer. Puis faisant tout d'un coup reflection sur luy même, ne seroit-ce pas, continuoit il d'un esprit de defiance, un effet de leur Politique, ne seroient ils point de concert, a me tromper ; & parce qu'ils sont assurez du cœur l'un de l'autre, n'affecteroient ils pas  
de



de ne se point aimer, pour le faire plus tranquillement. Non cela ne se peut, adjoua-t-il, & l'amour est une passion, qu'on a beau vouloir cacher, il faut ou qu'elle estouffe, ou qu'elle paroisse au jour. Alexandre n'est point aimé, où ne l'est que mediocrement. Il luy fut d'autant plus aysé de se le persuader ainsi, qu'il le souhaittoit de tout son cœur. De la sa passion prit de si grands accroissemens, qu'elle en devint plus grande que jamais. Il n'est rien, qui fomenté tant celle de l'amour, comme l'esperoir, ni qui soit plus aysée à se flatter, & à se promettre.

Laura fut rendre compte de toute cette belle conversation à sa maistresse, qui auroit bien souhaité, qu'elle se fust un peu relachée de cette grande severité, qu'elle avoit tesmoignée au Bassa,  
&

& qu'elle eust eu un peu plus de complaisance pour luy, sans laquelle, Elle jugeoit bien, qu'on ne verroit pas si souvent Alexandre. Laura au contraire disoit, que cette complaisance gasteroit tout ; parceque le Bassa, fondant la dessus quelques esperances de faveur, deviendrait encore plus amoureux & par consequent plus jaloux de son pretendu Rival. Que dois-je donc faire ? disoit cette pauvre Amante, si de tous costez j'ay tout à craindre ; s'il n'y a que mal-heurs, à esperer pour moy. Laura luy dit, que les choses n'estoient pas si desesperées, qu'elle deust s'en affliger : Que le Bassa luy avoit promis de luy envoyer le lendemain Alexandre, & qu'on verroit un peu avec luy, de quelle maniere on se devroit conduire.

Le Comte ne sçavoit pas, que  
le

le Bassa eust esté chez la Sultane : & comm'il ne l'avoit pas envoyé chercher de tout ce jour-là , il fut le lendemain de luy même a son levé. Il le trouva encore couché, dans un abattement & une melancholie sur le visage, qu'il estoit aysé de juger de la tristesse de son cœur. Il le receut néanmoins d'un air de bonne amitié, & qui ne tesmoignoît pas, qu'il eust rien contre luy. Il fut quelque tems sans luy rien dire ; & le regardant ensuite d'un air de confiance. Alexandre, luy dit il, je suis le plus mal-heureux de tous les hommes , & en amour plus qu'en toute autre chose. Laura, adjouâta-t-il en soupirant, la cruelle Laura n'a pas la moindre tendresse pour moy : Que dis-je pas la moindre pitié des maux, qu'elle voit, que je souffre pour Elle ; & si vous n'avez pas, vous même,

O

un

un peu de complaisance pour moy, je ne sçay, ce que je deviendray. Ah ! Seigneur, luy répondit le Comte, dites moy seulement, ce que vous desirez de moy ; & ce que je puis faire pour vous. Vous sçavez, poursuivit il, qu'on ne dispose pas du cœur des gens ; mais si je puis contribuer à votre satisfaction, si vous voulez, que je luy parle ; si . . . . . Que je serois heureux ! interrompit il, si vous vouliez faire ce que vous pouvez. Seigneur, s'il ne dépend que de moy, luy repartit le Comte, vous pouvez vous promettre de l'estre. Le Bassa garda après cela quelques momens le silence, comme s'il eust revé, à ce qu'il luy vouloit dire ; mais Alexandre le pressant de se déclarer à luy, il luy dit avec un peu d'embarras, de donner un rendez-vous à Laura dans une Chambre

de l'appartement de la Sultane, ou il se trouveroit pour luy. Cette proposition, si indigne du cœur d'Alexandre, l'estourdit d'abord d'une telle manière, qu'en ayant extrêmement rougy, il ne sçeut que luy répondre. Le Ba'a remarqua son desordre, & en fut plus confus que luy; mais de peur qu'il ne s'expliquât contre ses intentions, n'en ayant pas bien auguré de cette rougeur, il luy dit, pour se deffaire de luy, qu'il y allât songer; & qu'il luy rendist réponse, s'il en pouvoit esperer quelqu'une de luy, qui fust favorable; a ce qu'il desiroit.

Le Comte sortit de la Chambre, & alla faire mille réflexions sur sa mal-heureuse fortune, qui l'avoit réduit à cette extrémité, que de le vouloir faire servir de tel Personnage. Ce n'est pas, qu'il ne fust bien persuadé, que Laura

n'y viendrait pas ; & qu'il ne sceust, qu'il n'y alloit pas du sien, quand même elle accepteroit le party, & qu'il auroit favorisé la passion de l'amoureux Patron : mais c'est, qu'outre, ce qu'avoit de bas l'employ, qu'il luy donnoit là, il estoit au desespoir, qu'il l'eust jugé si mal-honneste homme, qu'aimant une fille, comm'il croyoit, qu'il aimoit celle là, il luy eust pû faire une pareille trahison. Cette seule pensée l'affligeoit ; & il ne l'auroit pas fait, quand il en auroit dû mourir.

Le Bassa, aprez l'avoir vû sortir de cette maniere de sa Chambre, crut bien, qu'il n'y avoit rien à esperer de ce costé-là : & comme c'estoit un homme fort raisonnable, il ne luy en voulut pas plus de mal ; au contraire il l'en estima davantage ; mais il voulut  
cher-

chercher à se contenter d'ailleurs :  
 Sa passion estoit arrivée en un  
 point, que n'y ayant plus ni rai-  
 son, ni bon sens, qui la pussent  
 moderer, elle estoit capable, de  
 luy faire tout entreprendre. Le  
 plus honneste de tous les hommes,  
 changé en un amant, desesperé,  
 devient le plus furieux & le plus  
 desreglé; parce qu'il est d'autant  
 plus sensible au melpis, qu'on  
 fait de luy, qu'il croit, de meriter  
 quelque chose.

Cét Amant transporté, n'ayant  
 donc pû reussir auprez d'Alexan-  
 die, sur une proposition, qui en-  
 fermoit une trahison, resolut de  
 tromper luy même Laura, & de  
 l'aller voir ce jour la deguisé en  
 Eunuque. Ce dessein n'estoit pas  
 des mieux concertez; neanmoins  
 il luy reussit, comme vous allez  
 voir. Il n'eut pas la patience  
 d'attendre, qu'il fust l'heure,  
 O 3 qu'il

qu'il alloit ordinairement chez la Sultane; car d'abord qu'il fut nuit, il partit travestý, comme j'ay dit, & se rendit à l'appartement, où n'ayant trouvé qu'une vieille moreffe à la porte, qui n'avoit garde de le reconnoistre, il l'envoya à Laura, pour luy dire, qu'un Eunuque de ses amys desiroit de luy parler dans la Chambre du Repos. Elle estoit ainsi appelée a cause qu'elle estoit fort retirée & sans bruit, où l'on alloit dans l'Esté passer quelques heures pour dormir l'après-dîner. Il avoit choisy cette Chambre, comme la plus propre pour le dessein qu'il avoit fait, & la vieille ne se fut pas plustôt chargée de cette commission, qu'il s'y alla cacher. Laura estoit alors occupée a quelque affaire; & la Sultane, ayant rencontré cette moreffe empressée à la chercher,

luy



luy demanda par hazard, ce qu'elle  
 vouloit de Laura. La vieille, à  
 qui on n'avoit pas fait un secret  
 de la commission, qu'on luy avoit  
 donnée, luy dit librement, qu'il  
 y avoit certain Eunuque, qui de-  
 siroit de luy parler dans la Cham-  
 bre du repos. La Sultane enten-  
 dant parler d'Eunuque, qui vou-  
 loit parler a Laura, ne douta pas  
 d'abord, que ce ne fust Alexandre :  
 Et sans considerer autre chose, ni  
 s'informer davantage de la vieille,  
 de quelle maniere estoit fait cet  
 Eunuque, Elle prend le Barnus  
 de Laura, & s'en va au rendez-  
 vous. Pour peu de reflection  
 qu'elle eust fait à cette ambassade,  
 elle ne s'y seroit pas trompée,  
 ni exposée si legerement au ha-  
 zard, où elle se mit. Ce n'estoit  
 pas la coustume de son Amant,  
 d'en user ainsi, ni de la voir au-  
 tre part que dans la Chambre de  
 l'Al-

l'Alcauve : a peine devoit il ſçavoir le nom, de celle, ou on luy avoit dit, qu'il attendoit Laura ; & apres, ce qu'elle ſçavoit du Baſſa, elle s'en devoit deffier. Mais quand on aime, de la maniere que la Sultane aimoit, on eſt ſujet à faire encore de plus grandes fautes. Elle ſçavoit, qu'Alexandre ne la devoit venir voir, que la nuit ; & neanmoins Elle l'attendoit depuis le matin, qu'elle avoit eſté éveillée ; & dans cette amoureuſe attente, qui la tenoit dans une mortelle inquietude, qu'il vint, cū qu'il ne vint pas, à mezure que l'heure s'approchoit, il falloit peu de choſe, pour la faire precipiter. Les femmes, qui auront eſté amoureuſes, avoueront bien, qu'il n'eſt rien de ſi difficile, que-d'eſtre prudentes dans ces occaſions là ; & que le ſeul nom de leurs Amants,

mants, quand Elles les attendoient, à esté capable de les faire tressaillir de joye, & même de courir sans sçavoir, s'ils estoient arrivez.

La passionnée Sultane se laissant donc conduire en aveugle, où Elle croyoit, que l'amour l'attendoit, emprunta les aîsles de ce Dieu, pour arriver plustôt à cette Chambre. Il n'y avoit point de lumiere; mais cela ne la surprit pas, parce qu'on n'en mettoit jamais dans cette Chambre. Elle se fesoit un plaisir d'amante de tromper Alexandre & de passer encore une fois pour Laura: C'est pourquoy, elle fit dessein, de garder quelque tems le silence, comme elle avoit fait au jardin, & de s'en divertir. Neanmoins en entrant, il luy prit un certain frisson de tout le corps, & je ne sçay quelle peur, qu'elle

qu'elle fut sur le point de s'en retourner sur ses pas ; mais le Galand, qui l'attendoit, l'ayant prise par la main, la rassura un peu. Elle se laissa conduire, où il voulut ; & il la mena au fond de la Chambre, où il ne voulut pas perdre de tems, pour se servir de l'occasion, & l'embrassant d'une maniere emportée ; quoyqu'en tremblant, il la mit d'abord presque hors d'estat de s'en pouvoir deffendre. Cette action parut trop violente à la Sultane, pour estre d'un homme comm'Alexandre, Elle s'en deffia, & faisant un effort pour l'arrester, apres luy avoir jusques-là laissé faire, Elle reconnut, mais un peu tard, qu'elle s'estoit abusée, & que cét homme n'avoit ni la taille, ni le visage de son Amant, & qu'il falloit, que ce fust le Bassa. Comm'en effet Elle n'en peut plus

plus douter apres certaines marques, qu'elle trouva en luy. Elle changea de methode, & se mit sur la deffensive. Cette resistance, que le Galand remarqua, apres les indulgences, qu'on avoit eu du commencement, luy fit bien voir, qu'on s'estoit aperceu de la tromperie, & qu'il ne pouvoit plus se cacher : C'est pourquoy, des lors, il ne mesnagea plus rien, & faisant ses derniers efforts, il rendit ceux de la Sultane inutiles, & vint à bout de son dessein. Cét Amant transporté fut du moins heureux dans ses idées : ce qui prouve assez la puissance de l'imagination, & que nos plus grands plaisirs viennent de là. Je suis bien certain, qu'il n'est point d'Amant mal-heureux, qui ne deust porter envie a son erreur; & qu'on ne peut pas avoir plus d'obligation au hazard.

Sa

Sa Passion estant ainsi contente, il se retira, sans rien dire à cette belle ; qui de son costé gagna aussi sa Chambre, le plustôt qu'elle peut, de peur que le Passonné Bassa ne revint à l'assaut ; Laura, qui avoit esté fort en peine d'elle, fut bien estonnée de la voir entrer en l'estat, ou elle estoit, qu'il fallut, qu'elle se mit sur le liét, où moitié pleurant, moitié riant elle luy raconta l'avanture, qui luy venoit d'arriver. Pour l'Esclave, elle n'en fit que rire ; & elle s'attendoit à des suites fort plaisantes, qu'auroit une affaire comme celle-là.

Le Comte, qui avoit esté le soir chez le Bassa, ne l'ayant pas trouvé y retourna le lendemain au matin, pour luy dire la resolution, qu'il avoit prise, sur la proposition qu'il luy avoit faite. Il apprit en entrant, dans l'apparte-

partement qu'il s'estoit trouvé fort mal la nuit, qu'il n'avoit pas dormy du tout, & qu'il avoit fait deffense de ne laisser entrer Personne dans la Chambre: Neanmoins comm'il estoit privilegié par dessus tous les autres, on le laissa passer, & il le trouva dans son liét, qui écrivoit, La mine si triste, & le visage si deffait, qu'il falloit assurément, qu'il eust passé une tres mechante nuit. Il rougit un peu, dabord qu'il vit Alexandre, qui mettait un genoux à terre devant luy. Je viens, Seigneur, luy dit il, vous demander encore une grace. Vous estes le principal autheur, de tout ce que je sens aujourd'huy d'amour, mon mal-heur veut que vous soyez touché de la même passion, acceptez, je vous supplie, le sacrifice que je vous en fais. Seigneur, je ne veux plus

P

aime

aimer Laura ; & si vous voulez  
 je ne la verray plus. Quelle sorte  
 d'Amans , jufte ciel ! s'écria le  
 Baffa en foupirant. Se peut-il,  
 que deux Perfonnes, qui ont com-  
 mencé de s'aimer avec tant de  
 tendrefse, fe puiſſent quitter l'un  
 & l'autre avec tant de facilité ;  
 & que moy qui ne ſuis point  
 aimé, je ne puiſſe pas gagner la  
 même choſe ſur mon cœur. Par-  
 lez , Alexandre, & dites moy ſi  
 c'eſt le degouſt qui vous prend,  
 cù ſi vous voulez bien vous faire  
 cét effort pour l'amour de moy.  
 Non Seigneur , luy répondit le  
 Comte , Laura eſt aujour-d'huy  
 auſſi aimable à mes yeux, qu'elle  
 me la paru le premier jour que  
 je l'ay veüe : mais pluſtôt, que  
 vous voir en l'eſtat, cù je vous  
 trouve, il n'eſt pas de violence,  
 que je ne ſois capable de me  
 faire, & pour vôtre repos & pour  
 le



le mien je voudrois ne l'avoir  
 jamais veü. Cét exemple est si  
 rare, luy repartit le Baïa, qu'il  
 faut avoir autant d'estime, que  
 j'en ay pour vous, pour vous  
 croire. Cependant vous verrez  
 par ce billet, que je n'ay pas at-  
 tendu, que vous me l'ayez mon-  
 tré, pour le suivre; & que je me  
 sçay vaincre aussi à mon tour.  
 C'est a Laura, que je l'ecris : lisez  
 le. Vous verrez, que si je vous ay  
 fait quelque injustice, je m'en  
 sçay bien punir. Je serois fâché,  
 qu'un aussi honneste homme que  
 vous, se separast de Nous avec  
 mechante opinion de moy. Le  
 Comte fort estonné de ce dis-  
 cours, dont il ne comprennoit  
 point le sujet, aprez une réponse  
 pleine de Respect & de Recon-  
 noissance, qu'il fit a son cher Pa-  
 tron, prit ce billet, & y lut ces  
 paroles.

Si tout ce qu'on sent de Passion pour une Femme, n'est pas capable de me justifier du crime, que j'ay commis contre vous, au moins devez-vous me le pardonner, apres avoir souffert dans une nuit, tout ce qu'un cruel repentir a de plus rude, j'en ay encore l'ame toute pleine de douleur & de confusion ; & si en vous donnant la liberté & à vôtre Amant avec vous, je puis reparer en quelque maniere une faute comme celle-là, vous pouvez vous-y preparer ; car vous partirez ensemble dès demain au matin. Adieu songez à l'effort, qu'il me faut faire pour cela, qui est de m'arracher les deux Personnes, que j'ay jamais le plus aimées ; & vous trouverez, que je ne suis pas tout à fait indigne de pardon.

Le Comte confus & embarrassé de la lecture de ce billet, si jamais

mais homme l'a esté, avoit bien de la peine, à cacher le desordre de son ame. Il se jetta pour la deuzieme fois à genoux, comme pour le remercier de cette dernière grace, qui auparavant son amour auroit esté sans doute la plus grande qu'il eust sceu desirer de luy, mais depuis sa passion, le plus grand coup de malheur, qui luy pouvoit arriver. Il voulut le luy cacher par cette action, & deslober à sa veüe l'effet, qu'elle fesoit sur ses sentimens. Neanmoins le Bassa le releva, & luy dit, qu'il ne le pouvoit voir en cette posture, pour un sujet, ou il avoit plus à se plaindre de luy, que de le remercier : Qu'il le sçauroit tout à loysir de Laura ; mais que cependant, il n'avoit qu'à s'aller preparer pour son voyage, qu'il avoit donné ordre à faire arrester

un vaisseau Chrestien, qui devoit partir ce jour-là pour l'Italie, & qui le porteroit à Livourne: Que le tems estoit fort beau, & qu'il s'embarqueroit le lendemain sans faute avec Laura, qu'il luy en donnoit sa parole.

Le Comte, ayant pris ainsi congé de luy, sortit de la Chambre, l'ame si pleine de trouble & d'affliction, aprez la nouvelle qu'il venoit de recevoir, qu'il eut besoin d'aller chercher un lieu propre pour la soulager, & pour entretenir ses pensées, sur la resolution qu'avoit prise le Bassa, de luy donner la liberté, & de l'envoyer avec Laura en son Pays. Il ne sçavoit ce qui pouvoit l'avoir obligé a la prendre; & il s'imaginoit bien, selon ce qu'il avoit lû dans ce billet, qu'il falloit, que ce Seigneur eust fait quelque outrage à cette Belle; mais

mais ce n'estoit pas, ce qui l'in-  
 quietoit : C'estoit la Sultane,  
 dont il falloit se separer, & luy  
 dire adieu pour jamais. Pour ja-  
 mais quitter une femme, qu'on  
 aime si tendrement ; la quitter  
 dans le plus fort de sa passion,  
 cela est bien rude, & je ne sçay  
 quel Amant s'y seroit pû resou-  
 dre, pour quelle raison que ce  
 fust. Neanmoins la liberté, qui  
 pour un homme, qui sçait, ce que  
 c'est, que d'estre Esclave, & un  
 homme de la qualité d'Alexan-  
 dre, est quelque chose de si at-  
 trayant, le Retour dans sa Patrie,  
 apres huit ou neuf mois d'ab-  
 sence, les plaisirs de Rome, &  
 la consideration que s'il perdoit  
 cette occasion peut-être qu'il ne  
 la retrouveroit plus de sa vie,  
 tout cela dis-je fesoit un party,  
 que la plus belle & la plus char-  
 mante femme du monde n'auroit  
 pas

pas enpeché de prendre à bien d'honnestes gens; mais les véritables Amans, qui ne considèrent rien au prix de la satisfaction du cœur, mépriseront toujours une liberté comme celle-là, qui leur cousteroit trop de larmes. Cependant dans la conjoncture de cette affaire, il n'estoit presque pas possible à Alexandre de refuser cette cruelle liberté, puisque c'estoit apparemment, tout ce qu'il pouvoit desirer, & que le Bassa la luy donnoit, avec une maistresse, dont il croyoit, qu'il fust passionnement amoureux. Quelle raison de refuser un present de cette nature, qui coustoit tant au Bassa, & qui devoit estre si charmant pour luy. C'estoit son desespoir, qu'il voyoit, qu'il n'en pouvoit trouver aucune; & qu'il falloit partir, si l'amour, dans ces extremittez favorable aux

Amans,

Amans, ne le secouroir, & qu'il ne fist changer de sentiment au Bassa, comm'il est fort ordinaire à ceux, qui prennent des resolutions contre ce Dieu. Jamais Esclave ne fit des vœux, pour estre hors de la chaisne, qu'il en fesoit luy, pour le cours de sa captivité, aimant plüstrôt estre Esclave, pour le reste de sa vie, que de s'esloigner si fort, & pour toujours, de ce qu'il aimoit mille fois plus, que sa liberté.

Le Bassa, aprez avoir passé encore quelques heures dans son liét à lever, sur la resolution qu'il avoit prise, a laquelle il se vouloit tenir, quoyqu'il en deust couster à son cœur, fit appeller son Aga, a qui il donna les ordres necessaires pour le depart de ces deux Chrestiens, leur faisant porter dans le vaisseau, quantité de provisions & de tres-riches  
pre-

presens, qu'il leur fesoit à l'un & à l'autre. Ensuite de quoy, il envoya son premier Eunuque à la Sultane sa femme pour la prier de trouver bon qu'il donnât la liberté à Laura qu'il vouloit renvoyer à son Pays avec Alexandre, pour des raisons, autant importantes pour elle, que nécessaires pour luy, & pour le repos de l'un & de l'autre. Ces ordres estant donnez, & la lettre, qu'il écrivoit à cette Esclave, en même tems envoyée, il monta à Cheval, pour aller au Bardou, qui est un maison de plaisance, qu'il avoit à un mille de la ville, d'ou il ne revint, qu'il ne fust minuit, ayant voulu passer tout ce tems là, à se promener solitairement dans ses jardins, pour s'accoustumer à ne voir plus Alexandre, & à n'entendre plus parler de Laura.

Il ne peut dormir de la nuit ;  
&



& le matin, son Aga luy estant venu rendre la réponse de la Sultane, sur la priere qu'il luy avoit envoyé faire, pour la liberté de Laura, il la fut d'abord porter luy même à Alexandre, qu'il trouva en apparence tout prest de partir, comm'il luy avoit ordonné, mais au fond & dans le cœur jamais moins disposé, esperant de moment en moment quelque changement dans celuy du Bassa. He bien ! Alexandre, luy dit il, il faut nous separer ; mais je ne sçay, comme nous ferons ; parceque la Sultane, qui aime Laura avec la même affection, que je vous aime, malgré tout l'interest, que je luy ay fait représenter, qu'elle avoit à ce depart, & à le souhaitter autant que moy, ne peut s'y résoudre ; elle m'a envoyé dire ce matin, qu'on luy osterà plustôt la vie, que

que cette Esclave. Il faudra, que vous voyiez Laura, & que vous luy disiez, qu'il ne tient qu'a elle, d'estre libre & de s'en aller avec vous : car pour moy, puisque je vous l'ay promis, je vous le tiendray. Cependant je feray, encore arrester ce vaisseau, a fin qu'il ne parte pas sans vous. Il y a, Seigneur, luy répondit Alexandre, assez souvent des occasions ; & quand pour contenter, où pour disposer la Sultane à faire cette grace a Laura on luy donneroit encore quelque tems, nous ne vous aurions pas moins d'obligation de la liberté, que vous nous accordez aujour-d'huy. Alexandre, luy repartit le Bassa, les résolutions, comme celle que j'ay prise en vôtre faveur, coustent trop a un cœur comme le mien, pour n'estre pas chancelantes, si l'on leur donne du tems.

Ser-

Servez-vous des bons mouvemens, que la Raison & l'Equitté m'inspirent. Je ne vous répons pas, que mes sentimens ne puissent changer. Le depot que j'ay contre la foiblesse de mon cœur, un outrage un peu cruel que je fis hier a Laura, la honte, que j'aurois de paroistre apres cela devant elle, & le peu d'espoir d'en estre jamais aimé, sont les veritables motifs de vôtre bonne fortune. Tout cela est encore frais dans mon esprit : n'attendez pas, qu'il s'efface; car il n'est rien de quoy l'on perde plus facilement le souvenir, que du tort que l'on a, & de l'injure qu'on a fait aux autres.

Comm'ils estoient à s'entretenir de la sorte, un grand More, qui servoit de pourvoyeur au Comte, & qui avoit coustume de luy apporter tous les matins sa

Q

pro-

provision du ferrail, où on l'alloit prendre, entra tout d'un coup dans la Chambre avec sa grand' Corbeille sur la teste, ne croyant pas, sans doute, que le Bassa fust avec luy. Il voulut d'abord retourner sur ses pas ; mais ce Seigneur luy fit signe avec la main de demeurer ; & il n'avoit garde, de luy desobeir : si bien qu'il mit la Corbeille à terre, qui paroissoit assez pesante, & se retira en même tems. Le Bassa, par pure curiosité, eut envie, de voir, ce qu'on envoyoit à Alexandre, pour manger ; & dit à un More, qu'il y avoit dans la Chambre, de lever le couvercle de cette Corbeille : ce que celuy-cy ayant fait, on trouva, pour toute provision, une femme assez plaisamment ramassée, & qui se cachoit sous son Barnus, pour n'estre pas connue ; mais ses habits à la Chrestienne, que

que le Bassa & Alexandre avoient déjà vû à Laura, ne les laisserent pas un moment en doute l'un & l'autre, que ce ne fust elle même. La surprise du Roy fut d'abord grande ; mais se prenant enfin à rire, j'avoüe, dit il au Comte, que l'invention est rare ; & qu'elle jaë l'esprit des femmes de ce Pays. C'est l'Amour qui l'a trouvée, & qui est le pere des inventions. Il est certain, au moins, qu'il ne pouvoit rien faire de plus à propos, pour le dessein que nous avons. Mais ne verrons-nous point, adjouë-t-il, la provision toute entiere. Madame, vous estes icy entre les deux meilleurs amys, que vous ayez, & vous ne devez pas faire de façon, pour vous faire voir. En suite de ces paroles il s'approcha de cette belle, & la voulut prendre par le bras, pour luy ayder à se lever ;

mais elle s'en deffendit & le re-  
 poussa. Je vois bien, Madame,  
 luy dit il, que vous ne m'avez pas  
 encore accordé le pardon, que je  
 vous ay demendé. J'avoüe, que  
 l'offense est trop grande pour en  
 revenir si tôt : mais vous allez  
 partir ; & du moins ne faudroit  
 il pas, nous séparer, sans estre  
 bons amys : car ce seroit pour  
 moy un regret eternal, de vous  
 voir sortir de ce Pays avec cette  
 haine dans le cœur. Ne refusez  
 pas cette grace, continua-t-il en  
 luy tendant la main, à un homme,  
 qui est au desespoir, de vous avoir  
 offensée, & qui s'en punit luy  
 même assez cruellement, pour  
 n'estre pas necessaire d'y adjou-  
 ter encore cette derniere cruauté.  
 Pour tout cela le Bassa n'averça  
 rien, au contraire, elle se cachoit  
 plus que jamais, & se fortifioit  
 dans cette Corbeille, pour qu'on  
 ne

ne la p<sup>u</sup>st voir. Il ne la voulut pas presser davantage ; mais s'adressant à Alexandre, il luy dit, que c'estoit à luy, à faire cette Paix ; & à prier Laura, qu'elle voulust bien se laisser voir un moment, puisque c'estoit pour la dernière fois. Le Comte trouvoit fort mauvais, qu'elle en fust tant de difficulté, envers un Seigneur, à qui elle avoit trop d'obligation quand elle auroit eu le plus grand sujet du monde, d'être fâchée contre luy, pour s'en pouvoir défendre dans une pareille conjoncture. Mais outre cette raison, il avoit un intérêt particulier à la presser, de se montrer : car c'estoit sa dernière ressource ; & il esperoit, que peut être le Bassa la voyant, sa tendresse, au moment d'un si cruel départ, reprendroit feu plus que jamais, & luy feroit changer de résolution. Il fut, dans cette

pensée, auprez d'elle; & luy dit  
 toutes les raisons, qu'il peut  
 trouver, pour l'obliger à se rac-  
 commodier avec le Bassa, & à se  
 laisser voir un moment à luy, sans  
 la pouvoir jamais persuader. Il  
 n'en receut pas seulement un mot  
 de réponse, de quoy un peu  
 fâché, aprez l'avoir prise deux  
 ou trois fois par le bras, pour la  
 faire lever, il fut sur le point, de  
 luy oster son Barnus par force.  
 Il l'en menaça même; mais le  
 Bassa ne le voulut pas souffrir;  
 & luy dit de ne la contraindre  
 pas davantage, qu'elle avoit assez,  
 à se plaindre, sans luy vouloir  
 faire, pour l'amour de luy, de  
 nouvelles violences. Profittons  
 seulement du tems, continua-t-il,  
 & puis qu'elle est icy toute por-  
 tée, & qu'il n'y a plus qu'à vous  
 embarquer, achevons, ce que nous  
 avons entrepris. L'occasion est la  
 plus belle du monde. Je crois,  
 que



que Laura ne sera pas fâchée, de sortir d'un Païs comme celuy-cy, & d'en sortir, pour vous suivre. Apparemment la Sultane dort encore : n'attendons pas, qu'elle soit éveillée. Il faut faire porter tout à l'heure Laura, comm'elle est dans cette Corbeille, au vaisseau. Vous l'accompagnerez ; & d'abord que vous y serez arrivé, vous ferez mettre à la voile. Pour moy, j'iray passer le reste de la journée au Bardou ; & donneray les ordres nécessaires à fin que, si la Sultane vient à s'appercevoir de l'absence de Laura, & à sçavoir, qu'elle luy soit eschappée, elle ne fasse courir apres elle, pour l'arrester. Apres luy avoir dit cela, il envoya un More au Port, avec ordre d'y faire tenir une Chaloupe preste, pour porter Laura & Alexandre à ce vaisseau Chretien, qui estoit à la Goulette. En suite de quoy, il envoya chercher son Capitaine des Gardes, à qui il,

dit,

dit, d'accompagner le Comte ; & de faire porter avec luy cette Corbeille par deux Mores , à qui il recommanderoit d'en avoir soin.

Tous ces ordres estant donnez, & n'y ayant plus rien à faire, qu'à dire adieu à son cher Alexandre, il l'embrassa avec les larmes aux yeux, & l'ayant accompagné luy même jusqu'à la Chaloupe, il s'en alla de-là, comm'il avoit dit, au Bardou, l'ame toute pleine de regrets & de douleur. Le pauvre Comte estoit bien plus à plaindre. Il n'eut pas beaucoup de peine, à luy tesmoigner le desplaisir, qu'il avoit de se separer de luy ; mais il estoit si grand, à l'égard de la Sultane, laquelle il auroit voulu voir du moins encore une fois, qu'il ne sentoit guere, celuy qu'il devoit à l'adieu d'un homme, à qui il avoit tant d'obligation. Son cœur fut si ferré, depuis qu'il vit, qu'il n'y avoit plus d'esperance, & qu'il falloit partir, qu'il

qu'il ne peut plus exprimer une seule parole. Ses larmes luy couloient des yeux dont le bon Bassa, que s'en fesoit honneur, estoit extrêmement touché ; & se savoit bon gré, de s'estre vaincu pour un homme, qui n'en estoit pas ingrat, & qui l'aimoit véritablement. Enfin il le vit embarquer, & luy dit le dernier adieu. L'affligé Comte estoit si accablé de douleur, que depuis le Port jusqu'à la Goulette, donnant un peu plus de liberté à son cœur, qu'il n'avoit osé faire en la présence du Bassa, il dit des choses si pitoyables, en regardant la ville, que le Capitaine des Gardes & les autres, qui l'accompagnoient, en estoient extrêmement estonnez & attendris. Par bon-heur ils n'entendoient pas l'Italien ; mais ses gestes, ses larmes, ses regards & la couleur de son visage, tout marquoit en luy une tristesse & une  
affliction,

affliction, dont ils n'avoient jamais  
veu de pareilles.

D'abord qu'il fut arrivé au vaisseau, il se jetta sur un liest, si fort hors de luy même, qu'il ne songeoit pas seulement à sa Corbeille ; mais le Capitaine des Gardes prit ce soin-là pour luy, & la luy fit porter dans sa Chambre. Apres quoy il prit congé de luy, & ayant dit au Capitaine du vaisseau de se mettre à la voile, il descendit dans sa Chaloupe, & s'en retourna à Tunis. Ce fut alors qu'Alexandre, se trouvant seul dans cette Chambre, s'abandonna au torrent de sa douleur. Ah Destins ! s'écria-t-il, injustes Destins ! Que vous ay-je fait ? pour me traiter si cruellement ; pour m'arracher d'auprez d'une Personne, sans laquelle je ne savrois vivre. Ah ma Sultane ! ma chere Sultane ! faut il que je vous laisse, faut il que je m'esloigne de vous, pour

pour toujours. Pour toujours, reprit il en se levant ? Ah ciel ! faisons nous plutôt porter à terre ; nous trouverons assez de pretextes auprez du Bassa. Fions nous davantage à l'Amour, qu'à la Fortune : Elle me trahy : & quoyqu'il puisse arriver, je ne puis, que mourir, & j'aime encore mieux que ce soit auprez de ce que j'aime, que d'une si cruelle absence. En achevant ces paroles, il voulut voir, si l'on estoit encore a l'ancre ; & il trouva qu'on estoit déjà bien loin de terre, & qu'avec le vent favorable qu'ils avoient, à peine voyoit on encore la Goulette. Quel desespoir fut le sien ! He bien mon cœur, dit il, il n'y a plus de remède, il faut peir ? Chere Sultane, ajouta-t-il, en prenant son espée, voy si je suis coupable dans cét esloignement ! & reçois le sacrifice, que je te fais de ma vie. Il tira  
alors

alors son espée, & s'en alloit percer les flancs, quand tout d'un coup, la Personne, qui estoit dans cette Corbeille, & qui avoit escouté jusques-là, tout ce qu'il avoit dit, se jetta sur luy, pour l'empêcher de passer outre. Laissez moy, Madame, luy dit il, laissez moy finir une vie, qui ne peut estre que mal heureuse, esloigné, de tout ce que j'aime. Ah cher Alexandre ! luy dit cette Dame en l'embrassant de toute sa tendresse, sans en pouvoir dire davantage, de la joye qu'elle avoit. Le Comte trouvant d'abord quelque difference, malgré le trouble & le transport où il estoit, de cette voix à celle de Laura, regarda, par derriere luy la Dame, qui le tenoit ainsi embrassé. Mais quel estonnement ! Quelle charmante surprise, pour un cœur comme le sien, en l'estat où il estoit, de voir, que c'estoit la Sultane même.

F I N.

er  
la  
-  
a  
r  
y  
i  
,  
a  
e  
-  
-  
e  
e  
e